



18212

I Mag. St. Dr. P

18212

registres
polono-philosophicus sive
Senator, Legatus, Miles Polonus
Vassuriae. 1700.



3192 Prawo.

TRISMEGISTUS
POLONO-PHILOSOPHICUS

Sive

SENATOR, LEGATUS, MILES
POLONUS

INTER OMINA, DECORA, FATA,
Philosophicè, Politicè, Historicè
REPRÆSENTATIVS.

atq;

In ILLUSTRISSIMO DOMINO, DOMINO
SIGISMUNDO FRANCISCO

G A Ł E C K I

PALATINO IN OVLA DISLAVIENSI

Inter omnia, decora fataq; Senatoria sem-
per fortunata

A D O R A T V S.

Nec non sub fortunatissimis ejusdem ILLUSTRIS-
SIMI MECÆNATIS Auspicijs

In publicam disceptationem propositus.

A R. D. JOSEPHO LEIB Seminarij Varšaviensis ad Ecclesiam
S. JOANNIS Alumno, Philosopho Absoluto, Præsede R. P.
CHRISTOPHORO EYNAROWICZ Soc. JESU in Collegio
Varšaviensi Societatis JESU Philosophiæ Professore.

Anno DEI Homini 1700.

2. XI. 68.



18212.I

Cum decoret cælos, Cerasq; Arafq; Polonas,
TER MAGNI meritò nomē, hic **AGNVS** habet.

E

LE
 enin
 fact
 Til
 præ
 con
 eleg
 tis
 ris,
 Te
 Ide
 eju
 ut
 du
 Te
 tat
 dit
 ho
 in

DEDICATIO.

Non Trismegistum, sed Te Tibi,
nempe Ter Maximo Majorem,
mea præsented Philosophia, IL-
LUSTRISSIME ac EXCEL-
LENTISSIME DOMINE. Veterem
enim illum Ægyptium Principem, dū recte
factorum gloriā sequeris, antecedis; neq; ille
Tibi, verū Tu in illius Ideam præponi ac
prævivisse debueras, nisi solā illi temporis
concessā prioritatem, Tibi virtutis primatum
elegisses: imò absolutā Thaumaturgæ virtu-
tis Tuae potentiā, efficis, ut bis vixisse videa-
ris, & olim in veteri illo Tibi, & hodie in
Te veteri illi Trismegisto, in exemplar &
Ideam absolutissimam. Efficitur & istud,
ejusdem virtutis GALECCIANÆ prodigio,
ut trina veteris Ter Maximi Magnitudo,
dū triplicis Tuae Magnitudinis accessione
Ter geminatur, sic tamen multiplicata, uni-
tatem non excedat, quod non aliena Tibi ad-
ditur, sed Tua redditur Magnitudo: nisi
hoc solo Nomine multiplicata censeatur, quod
in Te Major, quā in illo Ter Maximo

appareat. Crescit nimirum, decrescitq; vir-
 tutis quantitas, ad incrementa Nominum in
 quibus attollitur, vel deprimitur: nec ullus
 longius latiusq; eam produxit, quàm qui nec
 in prima, nec in media, nec in ultima etate
 corripuit. Atq; hæc est Trina Tuae virtutis
 mensura; PALATINE ILLUSTRISSI-
 ME: triplex nempe illa Tua Magnitudo, in
 prima etate, Heroica Martis, in media, libe-
 ra Equitis eruditissimi, in ultima, purpurata
 Senatoris Maximi. Auget extenditq; in Te
 Polonum Trismegistum, Magnitudo ex avito
 genere, Magnitudo ex conjugali fœdere, Ma-
 gnitudo ex fortunato cum primis Poloniae
 Magnitudinibus nexu, derivata: jamq; si
 alia hæc profecto Philosopho TRIA SVNT
 DIFFIGILIA, & QVARTVM PRORSVS
 IGNORATVR nempe æquale Triplici
 Magnitudini Tuae encomium. nempe gran-
 des materias ingenia parva non sustinent,
 & ipso conatu ultra vires ausa, succumbunt.
 Principia Magnitudinis Tuae ille scrutetur,
 qui Nili scrutari tentat Originem; ut ma-
 gnorum fluminum, ita & Nominum fontes,
 admiratione disertius, quàm oratione colun-
 tur:

Hieron. ad
 Nepotianũ.

*tur: illud sufficiat Domui Tuae Illustrissimæ
 inscripisse, quod Martius Poëta Nilo inscripserat. Non licuit populis, parvum te Nile videre. Increscant intumescantq; exiliora vada, allapsu hinc inde affluentium rivulorum, GALECCIANI Sangvinis, tota sese in fonte explicuit Magnitudo, nè vel infami multorum naufragijs fortunæ Eurippo, vel aureæ Tagi aut Hermi cujuspiam, Patriæ fatalis tempestati, vel emendicatis paludatorum siderum influxibus, quidquam deberet in acceptis. Atq; ut alios, eternitatis laureis coronatos GALECCIORUM Manes, inter beatæ pacis otia quiescentes, solenni Divorum cultui adorem silentio, vobis & vitam & animam, Philosophica hæc debet pagina, quos etiamnum superstites, in suam, in publicam scilicet gloriam & salutem, vivere, universa agnoscit Polonia. In Te Tuisq; meritis, Fraternalia Magni Palatini ac Generis GALECCIANI gloria, felicius quàm in suo Atlante cælum recumbit, Perillustris Magnifice Domine IOANNES GALECKI Vexillifer Zytomiriensis, Capitaneæ Bidgostiensis: sociâsti Capitaneis fascibus bellatrices Aquilas*

Lucanus.

Perillustris
 M. D. Jo-
 annes Gale-

cki Vexilli-
fer Zytomi-
riensis Fra-
ter Illustris-
simi Palatini

*Magne Aquilifer, ut orbi Polono palam ex-
hiberes, bono omine fortunatisq; Avibus, Te
Tui Capitaneatus Imperio cœlitus destina-
tum, qui sub militari Tuo Labaro, non so-
lùm formidabilem flagitijs potentiam, verùm
etiam amabilem recte factis prosperitatem, ter-
ritorio Tibi subiecto importares. Adjecisti
sublimi fortitudinem sapientiæ, Palladem
imitatus, quæ intus sapiens, foris armata est,
nec unquam triumphale muneris officijq; Tui
signum, magis candidum Patriæ exhibuisti;
quàm dùm illud hostili toties sanguine cruen-
tares. Nec plura audet GALECCIANA
suada profari, nè erubescas ad laudes Tuas,
imò ut altiùs erubescas id precatur, ut brevi
rubor Tuus fiat purpura, & candidũ gentilitij
Iunossæ vellus in Senatorium muricem trans-
formetur. Quid memorem Seraphicum illud
è domo GALECCIANA decus, Franciscanæ
columen familiæ Patrum Tuum Religiosis-
simum Palatine Illustrissime: fraterna qui-
dam in lingua & labijs portent Nomina, qui-
bus non profundior ore, nec stabilior fugaci-
bus verbis amor, Tu Avitum Patruï vul-
tum, amoremq; ut in corde Te ferre demon-
stres,*

Patruus Il-
lustrissimi
Palatini, Or-

stres, refers in pectore, præfers in meribus, ad
illiusq; Archetypum Senatoriæ vitæ typum
conformans, non minus in gloriam, quam in
vitam moresq; transtulisti. Parum scilicet e-
rat GALECCIANO Iunossæ, in Civiles pur-
puras avitum suppeditare vellus, nisi etiam
in Sacras Togas sufficeret, si quis iste profecto
dilectus Francisco Agnus, qui non vestigia
tantum Divino aestu calentia, verum etiam
candorem sui Pastoris imitatur, dignus qui
in cœlesti refulgeat zodiaco, postquam illud
quod in Gentilitijs Ceris notat sydus, vici-
num soli Seraphico refulserit. Iam conjugalia
fœdera, quantum Illustrissimam Magnitudi-
nem GALECCIANAM extendunt? sequun-
tur Illustrissimam DZIEDUSZYCCIA-
NAM stirpem, GALECCIANÆ Domui
intimè connexam, immortalia WISNIO-
WIECCIORUM, IABLONOWSCIORŭ,
LESZCZYNSCIORUM, MLECZKONŭ
&c. Nomina & decora, gemmæ scilicet coro-
nam, tot Nomina Augustum Magnæ Palati-
næ Nomen exornant. Fuerit quondam Am-
philia Cymbricæ serenitas, Pulcheria Romani
Phœbe Imperij: Tu Polonia, in una Palati-

dinis Sancti
Francisci Do-
ctrina &
pietate ex-
imius.

Consort Illu-
strissimi
Palatini pi-
etate alijs-
que virtuti-
bus insignis-
sima.

Filiæ Illu-
strissimi Pa-
latini maxi-
mæ spei.

P. Balde.

*na Illustrissima, innumerarum Purpuratarum Heroi-
narum decora intuerè, & recense si vales, quis enim
stellas numerare præsumat? Prudentiam virtutum
gemma, & Senatoriarum mentium germanum de-
cus, in Palatina Illustrissima requiris? ROSALIA
id est SIGISMVNDI, quod Cyro Aspasia, Tra-
jano Plotina, Augusto Livia. Pietatem in Sacras
Religiosorum familias inquiris? Pulcherias, Blan-
casq; in Palatina Illustrissima vivere non dubita.
Iunguntur Augustæ Matri Materna sidera, & side-
rum gemmæ, SOPHIA & FRANCISCA, par
Sororum plane sidereum, gemina Rosarum atq; Li-
liorum Calathus, Eboris Ostriq; commercium.*

--- Modestia, candor,

Ingenuus, Pax, cana fides, concordia formæ
Atq; pudicitia, pietas, suavissima morum
Temperies.

*Tu verò Palatine Illustrissime, jam non Alexandri,
sed SIGISMVNDI MAGNI, nempe Tuum ex
asse, quia Tuâ munificentia Tibi obæratum reputa
Aristotelem. In Trismegisto verò Polono-Philoso-
phico Senatorem, Legatum, Militemq; cum legeris,
Te ipsum intellige. mihi amplius præter vota scire ni-
hil superest. Vive Palatine Illustrissime semper fortu-
natus Trismegistus, nempe longeva incolumitate
MAXIMVS, secundâ semper fortunâ MAXI-
MVS, debitis subjectisq; virtuti Tue dignitatibus,
MAXIMVS.*

Ita precatur è voto Universæ Philosophiæ.

JOSEPHUS LEYB Seminarij Varsaviensis
ad S. JOANNEM Alumnus.

STRVCTVRA PRIMA SENATORIA IN PHILOSOPHIA TRANSNATURALI.

*Fascibus insignes & legum culmine fultæ
Convenère Domus, & qui lectissimus orbi
Sanguis erat.*

Claudianus.

*Per fasces numerantur Avi, semperq; renata
Nobilitate virent.*

Claudianus
Panegyri
Olybrij &
Proбини.

INSCRIPTIO PHILOSOPHICA PRIMA. T H E S I S.

Scientiæ transnaturalis Majestas tam est sublimis,
tamq; universalis, ut nullis partium differentijs sese
immittat, nullas particularitates sequatur, abstractissi-
mi Entis contemplationi intenta: hinc etiam inter
symbolicas statûs sui tesseras istam recenset.

*Ens potest perfectè præscindi à differentijs, & differentia vi-
cissim ab Ente.*

H Y P O T H E S I S.

Ossolinscianæ Domui Illustrissimæ illud meritò in-
scripsero, quod quispiam Alveari apum adjecit:
privati nil habet ista Domus. Hæc fuit mens Catonis,
hæc Fabij; hæc Metelli, hæc hodie OSSOLIN-
SCIORUM

--- Patriæ impendere vitam,

Nec sibi, sed toti genitos se credere mundo.

Tot hæc magnorum Comitum Domus complexa Cato-
nes, quibus Patriæ dignitas honore proprio carior ju-
dicatur, tot Attilios, quibus vel sepulchralibus saxis
in terminales erectis lapides, patrios extendere fines
est solenne, tot Æmilios ac Scipiones, quibus vitâ dul-

A

cus

cius saluti Patriæ immori, ejus fortunam, suarum dis-
pendio fortunarum propagare, intra Religionem, ac
cardinalia Domus Celsissimæ jura recensetur.

Jam si Illustrissimæ Familiæ OSSOLINSCIANÆ
origo & claritas stylo committeretur, integra Annaliū
laborarēt volumina, cum Bielscio teste Insigne ASCIÆ
vulgò STARZA à vetustate dictum, ante Craci impe-
rium, Polonos Heroes exornarit, atq; adeo Palatinis
Fascibus, divisa in duodecim Palatinos Regni admini-
stratione insertum reperiat. Hinc iste purpuratus
OSSOLINSCIANI sanguinis progressus Rubicon, tot
Comitum ac Senatorum bistinxit purpuras, quot Se-
natui Polono intulit OSSOLINSCIOS, tot Senatui
intulit, quot in lucem protulit, Sago Togaq; illustris-
simos. Innovarunt veterum STARZONUM COMI-
TUM TĘCZYNIORUM OSSOLINSCIANÆ STIR-
PIS Aboriginum gloriam ANDREAS OSSOLINSKI
Castellanus Vislicensis Mars in Sago, in Toga Polonus
Confus: JOANNES OSSOLINSKI Comes de Tę-
czyn, Wilmuntow, Ossolin, & Balice Castellanus Ra-
domiensis, Vladislai III. Poloniarum Regis Minoren-
nis, Tutor, atq; Regni pro tenello Principe administra-
tor; non impar profectò unius majestatis portando
oneri, è cujus humeris Regis ac Regni, duplicatum se-
curè ac gloriôsè onus pependisset. Atq; ut à primis
Iberis ortus oceanus, in æquora partitus innumera,
quot circumfluit gentes, terras, ac Regna, totidem ac-
quirat nomina, jamq; Arabicus, Persicus, Gangeticus,
Magnus, Sarmaticus, Herculeus, Gaditanus, Indicus,
Atlanticus &c. appellatur, ita ex Capitolio immortalitatis
OSSOLINSCIANÆ, ceu è capite profusus OS-
SOLINIORUM sanguis, innumeris Nominibus titu-
lisq; totam latè implevit, impletq; Poloniam. Quæ
penna comprehendat Sarmaticum illum OSSOLIN-
SCIANÆ Stirpis Oceanum, nostræ ætati viciniorem;
nem-

nempe ZBIGNEUM OSSOLINSKIUM Palatinum Sendomiriensem, è cuius gemino connubio, ceu totidem purpuratis alveis OSSOLINSKIANA profusa posteritas, paludatis ætates implevit annis, annos annalibus exæquavit, Annales oneravit meritis, merita emeritis in Sago & Toga Insignibus coronavit. Primo, imò Principe universæ Familiæ voto, ad orbis vota è fortunato ZBIGNIEVI & FIRLEIOWNÆ connubio, exortum illud Polonæ Eloquentiæ flumen, illimis svadæ flexanimæ fons, GEORGIUS OSSOLINSKI S.R.I. Princeps, Supremus Regni Poloniæ Cancellarius, in quo Poloni Senatûs majestas, postquam se ipsa majorem agnovisset, Europam universam impletura, in capite orbis se explicuit, Latioq; se intulit, ut præferret. Vidit URBANUS VIII. PONTIFEX MAXIMUS in Magno Legato grande illud, Senatorium plane ac veterum Fæcialium autoritate augustius supercilium, & non dubito, quin communis orbis Pater, sterilem illam paribus edendis ingenijs ætatem expertus, Georgium UNICI FILIJ Nomine, insignivit. Obstupuit Roma in Senatore Polono Senatûs Romani majestatem, & vivæ vocis oraculo à Capite Ecclesiæ derivato conclusit *Credere se Ciceronem pro rostris melius & majori populi Romani cum voluptate non perorâsse*, Afferuitq; simul vetus Latium in Lechiam migrâsse, in qua ejusmodi orbis decora nascerentur, qualia post veteres Tullios Romanis non ampliùs superessent. Et quia virtus Phænix non est, ejusq; species in individuo non salvatur, & magnitudo Heroum longa serie suos respicit Protoplastas, generosaq; germina similes repullulant in ortus. Hinc paterna Georgij Glòria grandia Poloniæ solatia geminavit, postquam ex Georgio oriri FRANCISCUM, & in FRANCISCO redoriri Georgium fortunato Patriæ Horoscopo ostendisset. Verum cum invisa fatorum series, deneget magna stare diu, ostendè-

Vassember-
gius Gestor-
um Vladi-
slai IV. Par.
2. l. 1.

re Franciscum tantum terris, nec ultra esse sivere,
 excelsaq; Georgij solatia, velut in radice subvertere
 molita, paternas spes in Filio amoliebantur. At fa-
 ventius semper OSSOLINSCIANÆ Familiae cælum,
 adamantinum Fatorum robur, cerea planè sequioris
 sexûs manu confregit, postquam unius jacturæ nati,
 triadem natarum sufficiens, tribus Parcis totidem Po-
 lonas Gratias opposuisset. Ex illa tandem Heroidum
 triade, Helena Alexandro, Ossolinia Lubomirio Pala-
 tino Cracoviensi nupta, Josephum Lubomirium Mare-
 schalcum Curiae Regni etiamnum superstitem dedit
 Poloniæ. Altera Georgij Nata Teressia Anna, SIGIS-
 MUNDO S. R. I. Comiti à DONHOFF, ô quam au-
 spicatis sociata thalamis, ex qua fortunata proles in
 Georgio, Georgius, in Cancellario, Cancellarius, in
 Nepote Avus est renatus, postquam avitus honor, in
 honore Nepotis maximi renasceretur. Profectò felix
 illa dies, quæ magni conscia partûs GEORGIUM edi-
 dit, aviti ut sanguinis, ita honoris heredem, hoc glo-
 riosiore, quod jure virtutis magis, quàm sanguinis
 avitam dignitatem hereditasset. Transiit non gravatè
 Cancellarius Honor in Magnum DONHOFFIUM, non
 minùs JOANNIS III. Poloniarum Regis Invictissimi
 imperia, quam merita secutus, postquam solennis hic
 virtutis pedisequus, avitorum meritorum in Magnum
 Nepotem transeuntium vestigia deprehendisset. Invo-
 lavit facile cum signatoria Regni gemma, manum AL-
 BRACHTI Polona Aquila, postquam cognatam Honori
 prædam, virtutem scilicet in ea, Præsuleo murice rube-
 scentem observasset. Sapientiam Magni Georgij, e-
 loquentiamq; mellissuam, Os aureum, oraculum Re-
 gum, quoties purpuratus Patrum Patriæ audivit Sena-
 tus, toties Donhoffiano auditus est Tullius ore
 loqui.

Celsissimus
 Princeps Ge-
 orgius Don-
 hoff Episco-
 pus Premisl.
 Cancellari-
 us Regni.

Te pie

*Te pietas, Te cana fides, jucundaq; mitis
Temperies animi, manans ceu limpidus amnis
Præcipiunt circumq; meant, Te gratia fandi
Et Themis, & firmo nitens Prudentia talo,
Ante omnes illustrat Avos.*

P. Balde in
Elogio Blit-
terfviciano.

Jam si Regalia Poloniæ judicia, cælo à Te reducta
Astræa inspexerit, veterem Areopagum in Affessoriali
Tua Curia, in Te uno innumeros spectabit Aristides,
qui partium studijs haud obnoxius, omniq; altior
ambitu

--- placidi moderamine juris

Occurrens facili componis diffona nutu,

Concentumq; facis legum, morumq; tenore

Non favor obliquat causam, non cogit in arcum

Asperitas. Lancem facundia vergit in æquam.

Idem ibid.

Tertia Zbigniewi Ossolinij Palatini Sendomiriensis nata
Ursula Birgitta in fœdera vitæ thalamiq; sociata Kali-
novio, Præfecto Castrorum Poloniæ, triade filiorum
innumera Domûs Illustrissimæ vota coronaverat, ve-
rùm breves in duobus experta delicias, Magna Do-
mus, tertij Capitanei Gniewkoviensis & Łoioviensis
Filiam, spei purpuratæ heredem MORSZTYNIO Ca-
pitaneo Kovaliensi nuptam, immortalium è Domo Os-
solinsciana Heroinarum Heroidumq; abolutissimam
graphydem, omniumq; in una Epitomen reliquit Polo-
niæ. Atq; hæc est prima Ossolinscianæ Domûs series,
quæ à Zbigniewo non minus in nostra tempora, quam
fastos æternitatis, per innumera lustra, & Olympiades
continuato cursu influxit: neq; tamen more exilium
fluminum currendò currere cessat: in secundam imò
secundissimam Ossoliniorum seriem ab eodem fonte
profluentem, attolle oculos Polonia, successusq; vete-
res melioribus fatis correctos venerare. Prima nempe
Zbigniewi vota adversantibus Fatis in Firleiwona, ever-
sa, erexit secundavitq; juncta Polono Honorio Pulche-
ria,

ria, five Serena Probino, è Domo Illustrissima Sienien-
sciana in decus & spem Ossoliniscianæ Domûs as-
sumpta: geminâ illa prole, conjugalia vota corona-
vit Zbigniewi, nempe Christophoro Palatino Sendomirien-
si, & Maximiliano Castellano Czerscensi: secundior primo secundus & vel inde primo prior, imò
Primus Felicianus, quod vota augusti Patris, primo-
genito beâssset augustius: atq; non ignarus, ut terræ ita
thori conjugalis primitias cælo deberi, primi voti è
Kazanovia Marechalcide Regni susceptam triadem Filiorum totam litavit superis, postquam tres Religiosos
Ascetas, & Ascetarum Abbates, trinum nempe perfectissimum obtulisset, ratus supremæ illi conjugalium
fæderum arbitrarè Triadi, plenius se non satisfacturum, quàm si totam, quam ab eadem acceperat triadem restituisset. Nec defuit liberalitati Ossoliniscianæ, liberalior semper erga mortales cælitum munificentia, postquam enim Maximilianus Filios cælesti vitæ, & Divorum Filiorum Matrem Divis cælitibus adscripsisset, Sieniniscia Glebocciam suffecit, thalamumq; Maximilianiani, quot Filijs, totidem gemmis distinxit, è quibus alijs in coronam æternitatis translatis, vivunt adhuc, & diadema Poloniæ ornant & armant Maximilianus, Michæel, Sieciechus Castellaniæ Czerscenses, Magno Parenti par soboles. Hanc demum à Magno Zbigniewo derivatam Ossoliniorum seriem, augent fraterna Nicolai Ossolinij Palatini Podlachia decora, quibus verior Deorum Mater Ossolinisciana Domus coronatur, Domus inquam, cui longa propago, innumeræq; manus. Non cessit profecto Zbignievianæ felicitati fortuna Nicolai, quam pares thalami, & thalamorum par gloria prolis pariter fecère immortalem. Novam à Nicolao Ossolinisciorum seriem tergemini deducunt Fratres; nempe ut majora flumina quò latius circumflua regnent telluri, in plures sese dividunt
alve-

alveos in unum tandem oceanum provectis in immen-
sum fluctibus refluxura, ita & geminorum Ossolinscio-
rum virtus trifariam divisa, in unum tandem Capita-
neum Drohiciensem sese collegit, ut unita virtute, in
nova illustrissimi sanguinis incrementa fortius & copi-
osius se effunderet. Hinc demum exorta illa inclyta
Ossolinsciorum Nomina, Jacobus Ossolinski Vexillifer
Mielnicensis, Maximilianus, Venator Podlachiae, Geor-
gius Vexillifer Nurensis. Hinc magno Jacobo non
minor soboles Stephanus Ossolinski Enlifer Mielnicen-
sis, Antonius Ossolinski Paterfamilias Mielnicensis. Hinc
Vexilliferi Nurensis Sacra Civiliaq; pignora, Dionysius
Dapifer Nurensis, Zbigneus Canonicus Lateranensis,
Joannes Ossolinski Abbas Vitoviensis, Michaël Fra-
trum minimus, par gloria Maximis. Hæc tantaq; Os-
solinsciorum Nomina, merita & virtutes, quisquis in-
valida penna recensere præsumpserit

--- *Immensum natatu*

Exiguo superare Lembo

Præsumit aquor.

Te vero magni Maximilianī maxima Proles, cui hæc
se obaratam pagina profitetur, quibus celebrabo en-
comijs? Ac te imprimis Perillustis Magnifice Domine
Casimire Ossolinski Dapifer Podlachiae. In Te pater-
na Ossolinsciorum Maternaq; Krasowsciorum concen-
trata Decora, collecti, è materno sanguine Krasinscio-
rum, Sapieharum, Kuklewsciorum, Podosciorum,
Szydłowsciorum, Nieborsciorum, Mączynsciorū, Kar-
sciorum, Butlerorum, Chądźinsciorum, Howsciorum,
splendores, grande gloriæ, meritum, virtutum, Po-
loniæ exhibent compendium, adeo ut vel Te in omni-
bus vixisse, vel Tuā omnes spirare animā crediderim.

In reliquis scintilla micat, tu totus Avorum

Ignibus ardescis.

Jungeris ut sanguine sic meritis Castor dilecto Polluci
Per-

Perillustis Magnifice Domine Franciscæ Ossolinski Vexillifer Drohiciensis, quorum æquatas sanguini ac germanas plane dotes, quisquis attentius inspexerit, illud meritò inscribet, quod quispiam soli imaginem suam nubibus imprimenti apposuit, *an duo, an unus?*

Dares Phrygius l. 4. de bello Troiano.

*Ore pares Patremq; genis Matremq; secuti,
Priamidæ gemini studio certante, Minervam
Partiti: colit hic artes, hic arma fatigat
Deifobum Mavors, Helenum demulcet Apollo.*

Vivite magnæ Ossolinsciorum animæ, assurgat in Magno Casimiro & Francisco, Michæele, Adamo, Joanne, Ossolinsciorum gloria, ac cum sanguine avito, per Polonium diffusa orbem, non jam scuta galeasq; virum, verum Ducales Clavas, signatrices legumq; Custodes gemmas, Rectores Terrarum Scipiones, Palatinas Curules in Capitolium æternitatis Ossolinscianæ triumphali portet & reportet refluxu.

STRUCTURA II. MARTIA. IN PHILOSOPHIA NATURALI.

Virgilius
Æneid. l. 8.

*In qua res Italas Romanorumq; triumphos
Haud vatum ignarus, venturique inscius ævi
Fecerat Ignipotens. Illic genus omne future
Stirpis ab Ascanio, pugnataq; in ordine bella.*

INSCRIPTIO PHILOSOPHICA II.

T H E S I S.

Bellatori Philosophiæ Naturalis Exercitui, omnis campus arena, nulla in bellis cunctatio, idemq; est in campo consistere ac confluere. Hinc & solennis Philosophi Naturalis tessera

Inter Agentia contraria debite sibi applicata, datur actio & reactio in primo instanti applicationis.

HYPOTHESES.

HYPOTHESIS.

Ossolinscianum est illud, quod suo Cæsari Florentinus inscripsit *Pòeta Reptasti per scuta puer, Thracumq; recentes exuvia, tibi ludus erant.* Fastus ille nimium arrogans cujusdam erat militis, qui à suo Imperatore de origine interrogatus reposuit: *Bellona me genuit, Mars auspicijs Geticis lustravit infantem, Victoria nutrix fovit sinu, cadentem de Matre, clypeo excepit, vix auras traxi, & jam allisi vagitum umbonibus.* Fastus hic inquam erat, eventus resq; Martijs Ossolinsciorum Heroibus servabatur, quibus aliter nasci, quàm Heroes non licet, non Cygneis plumis, verùm horridis Leonum exuvijs, galeis loriciq; incubare, sub tentorijs canescere, nec aliter vitalem lucem, quàm Hercules in cunis, jam Jove dignos intueri. Vivit in posterorum memorijs Nicolaus Comes de Balice Ossolinski Castellanus Vislicensis, Ludovici Poloniæ & Hungariæ Regis, tum Vladislai Iagellonis ob Martiæ virtutis à tenera ætate gloriam amor & delictum, Polonus Drusus, cui nec Adolescenti feriæ contigerunt, totaq; sub galeis Mavortia canuit ætas. Assurgit inter Gradiivi hederas, Andreas Ossolinski, qui bellica virtute ætatem prævertens, prætextam sago commutans, in castris Sigismundi Cæsaris, & Hungariæ Regis, post coronata innumeris victorijs bella, à Proceribus Hungariæ invictus Heros, & sæculi illius Hercules est appellatus. Invisi Patris fortitudinem occuparunt cum sanguine non inferiores Nepotes Joannes, Andreas, Nicolaus, Hieronymus, non partâ solum domi, verùm etiam quæsitâ ultra Patriam belli gloriâ clarissimus, qui in bello Senensi sub Joanne de Medices Hetruriæ Duce, non tam passibus quam laudibus & victorijs postquam integram replisset Europam, feræ palam reliquit posteritati Ossolinscianæ gloriæ magnitudinem uno non claudi orbe, ac demum sub pellibus ætatem ducere, sub tentorijs hyemes pati,

Claudian.
de tercio
Consul.
Honorij.

inter fulmina belli, lituosq; Gradivi quiescere, stragibus ac mortibus incumbere, bella & victorias somniare, illud planè Polonum ac Ossolinscianum esse. Quis reliqua Ossolinsciani Martis pignora, quis in triumphales laureas vel è mortualibus bustis resflorescentes Polydoros recenseat, fastis æternitatis perenniori adamante inscriptos. Sufficiat ipsis Poloni Vatis entheo & calamo inscripsisse.

*Hi vel corusco se propè siderum
Curru locârunt, vel propius Deo
E nube reclines curuli*

Sub pedibus sua fata cernunt.

Si ubi fortes creari fortibus inter apocrypha degener à Magnis Natalibus recenset partus, in vobis par maximum Fratrum Casimire & Franciscæ oraculi fidem habeat est necesse, & ut

- - - Se vellere toto

Prodit, Avosq; suos Massyli bellua saltus,

Ita se in vobis spectat Diva Parens Ossolinsciana Domus lætata genuisse pares. Vos magnæ animæ in suo Achille descripsisse videtur Phrygius Vates

- - - pius æquat Achilles

Dares Phrygius de bell.

Troi. lib. 4.

Vultu Phæbum, animo Gradivum, Pelæa membris.

Vive Magne Casimire ætates semper triumphales, Tibi amica Bellatoribus Numina Mars & Latonia, triumphalibus palmis fortunata extendant sæcula, & Martia

*Laurus annosum tibi signet ævum
Fata Te nôrint, properentq; Parca
Nescium carpi Tibi destinatos
Stamen in annos.*

STRV.

STRUCTURA III.

SACRA.

IN ANIMASTICA

*Hic genus antiquum, Teucris pulcherrima proles,
Quisq; Sacerdotes casti, dum vita maneret
Quisq; p̄j Vates, & Phœbo digna locuti
Inventas, aut qui vitam excoluere per artes
Omnibus his niveâ cinguntur tempora vittâ.*

Virgi. *Æne.*
lib. 6.

INSCRIPTIO PHILOSOPHICA III.

THESIS.

Cum omnium viventium nihil post fata superfit,
homo tum maximè vivit cum moritur. Hinc
etiam tessera Philosophica.

Anima rationalis est immortalis.

HYPOTHESIS.

Ossolinſcianæ Immortalitatis Capitolio illud ada-
mantino stylo inaratum lego.

Non totus moriar, multaq; pars mei

Vitabit Libitinam.

Horat. l. 3.
ode. 30.

Eant malè felices illi mundi Fortunati, & suam felicitatem futurorum improvidi, quia increduli, præsentibus tantum circumſcribant ſolatijs, æternis proſcribendi, eant inquam & molli Epicuri cæno, erectos ad cælum immergant oculos animoſq; vivant Sybaritas, quibus mollis voluptas pro Numine colitur: ruant quo libet ruptis recti honeſtiq; pedicis, excuſſo Legum Divinarum jugo Libertini illi, quibus nihil magis licet, quàm quod illicitum, nulla gratior licentia, quàm in carnis ſervitute, nec major libertas, quàm ſub crudeli corporis Dictatura. At ô quàm arcta gemunt ſub cuſtodia, quibus omnia clauſa præter inferos, nunquam

non pavidī, quia nunquam non rei : ut enim Innocentia se ipsam sine custode tuetur, ita crimen nullo arcium munimento est securum. Ossolinscios, amor Dei ad terrorem lethi immobiles, ceu saxeam figit Niobeā : nempe nihil timet, qui grandia sperat, contemptorem animum vitæ præsentis, parit non dubia spes futuræ. Hinc in Ossolinsciana Domo Illustrissima nata feliciter in sacratis Deo animabus victura perenniter, gloriosissima illa morientium Ossolinsciorum mundo funera, felices animæ cælestia suspirantes, mundo exspirando immortale Divinioribus exedris & Religiosorum asceterijs decus inspirarunt. Spectavit Polonia Joannem Ossolinski Equitem Melitensem, Hieronymum Ossolinski Abbatem Coprinicensem, qui ob morum suavitatem & vitæ innocentiam deliciæ sæculi illius, communi Poloniæ ore meruit appellari. Vidit in tribus Ossolinscijs tergeminos Abbates Pokrzywnicenses, suspexit Jacobum Ossolinski Andreæ Castellani Radomiensis Filium in Societate JESU insignem vitæ morumq; integritate Ecclesiasten ac Theologum, vidit alia sanctioris Togæ Ossolinsciorum Numina, illudq; cuivis, Orthodoxi Vatis inscripsit encomium, *tantum spectabat euntis ora Dei, vultusq; suos flectebat in illum.* Spectat etiamnum Zbigneum Ossolinski, Canonicum Lateranensem, Joannem Abbatem Vitoviensem duo Lumina Fratrum, ac Ledæa Togæ sanctioris sidera, quibus inter purpurata Poloni cæli Lumina, arcano cælitum consilio disponuntur avitarum dignitatum cunrules, jam coronatus Lechiæ

Claud. de
laud. Probini
& Olyb.
Fratrum.

--- Signifer optat
Adventum : stellisq; parat convexa futurū.

STRUCTURA IV. EQUESTRI.

IN PHI-

IN PHILOSOPHIA RATIONALI

--- hic Caesar & omnis Iuli

Progenies magnum cæli ventura sub axem.

Nam si dispositis fumosa per atria ceris

Pondus inest aliquod pretiosaq; stamina secum

Natales, & Fata ferunt, magnumq; putatur

Per longam seriem, Torquataq; funera nosci?

Quisnam OSSOLINIOS non sanguine censet avito?

Intemerata suos cingunt monumenta Nepotes,

Nobilitas à fonte fluit, rubigine sacra

Claras effigies, stirpemq; attollit origo.

Virgil. lib.
6. *Æneid.*

Balde. 1

INSCRIPTIO PHILOSOPHICA IV.

T H E S I S.

GENUS Logicum subsistere non potest, nisi plurimum specierum columinibus innitatur. Hinc etiam tessera Nobilitatis Logicæ.

Genus est prædicabile de pluribus specie differentibus in quid incompletè, ideoq; essentialiter requirit plures species.

HYPOTHESIS.

Ossolinsciani generis longa propago innumeræq; manus, & iturus in æthera vertex. Arborem illam Indicam in innumeras arbores, imò sylvam integram, excrescentem, meritò ego Ossolinscianam Illustrissimam Domum appellavero, ac potiori jure inscripsero UNANEMUS. Quoties profectò hanc inclytam stirpem cogito, videre etiam videor auream quandam in Elysijs Poloniæ campis Arborem, quæ fulgentes viridi ramos curvata metallo, aureis frondibus pomisq; prædives fortunatum Patriæ semper felicitatis facit autumnum. Decerpserit sanè non paucos mors invida pretiosos foetus, non unum communia fata infregerint virgultum, integer tamen vivusq; truncus, iterum visus simili alia fronde virere nova. Dicam re-

Atque cum Theodorico Rege *Nati sunt Fasces ex Fascibus
 & naturam retinentes fetus arborei, pullularunt iterum de-
 center abscissi.* Atque ut plura Magna Sago, Maxima
 Toga Ossolinfciorum Numina, in disertâ svada profun-
 diori veneretur silentio: in fontem suum recurrit oratio
 in Te inquam Perillustri Magnifice Domine Casimire
 Ossolinski Dapifer Podlachiae: quis Togæ Curulibusq;
 Lechiæ, proxima, illa mentis Tuæ Decora, illas Osso-
 linscianas planè dotes exæquet? Tua est illa virtus
 quam suo Trajano Magnus adscripsit Orator: *Perinde
 summis atq; infimis charus, tanta concordia gloriam amoremq;
 contigisti, ut nihil veritati hilaritate, nihil gravitati, huma-
 nitate detrahatur.* Hæret lateri Tuo quisquis accessit, fi-
 nemq; sermoni suus cuiq; pudor non Tua superbia fecit.. Or-
 nabatur quondam Nobilitas aurea veste sub Antiocho,
 picta chlamyde sub Sertorio, purpurâ sub Cleomene,
 expolitis armis sub Cæsare, rubenti sagulo sub Artaxer-
 xe, candenti tunica sub Cyro, scuto puniceo sub Age-
 filao, figuratis auro Togis sub Aureliano, amictu ar-
 gentea cruce signato sub Constantino, Tibi Magne
 Dapifer non alius cultus placet, quàm qui Tuorum
 majorum virtutibus & meritis distingvitur, meritis
 inquam, ad quæ Te & Pater Æneas, & Avunculus
 excitat Hector: dicam clariùs Polonus sacro in murice
 Nestor Celsissimus Princeps Cancellarius Regni, ille
 inquam Senator; illa probatissima ingeniorum lima,
 Lydius planè Sacræ Civilisq; Politicæ lapis, ad cujus
 trutinam toties indolem Tuam exploratam ante fidem
 solis judiciumq; Poli Poloni, parem avitis honoribus,
 ostentat Genius ille verè Ossolinscianus, purpurato-
 rum sensuum interpret & arbiter familiaris. Derivâsti
 à Literatissimis Majoribus cum sanguine mentem illam,
 quæ Literariæ Palladi apertum in Te pectus & ma-
 num semper proponit, adeo, ut jam Aristoteles noster
 suos Horatijs Mecænates, Martialibus Domitianos,

Plin. in
 Trajan.

Vir-

Virgilijs Octavianos, non invidet, postquam omnes
in uno possidet Ossolinio. At siste calame, nunquid
tu uno eoq; tenui pede laudum intervalla percurrere
poteris, quæ in longam æternitatem porriguntur.
Erunt, erunt graviore Plinij, qui Orthodoxum hunc
Trajanum styli majestate prosequuntur, erunt Divini-
ores Horatij & Virgilij, qui omnem Pòeseos concen-
tum suo Nomini consecrabunt. Tibi quem semel pro
merito colere non sufficit, sufficiat perenni semper
colere gratitudine.

Tibi quoq; Illustrium Heroum sanguis Perillu-
stris Magnifice Domine Francisce Ossolinski Vexillifer
Drohiciensis, nihil cum adventijs colorum umbris, ad
Ideam Magni Herois adumbrandam, qui tibi ipsi satis
es. in Cujus vultu Augustale Majorum Gloria deline-
avit, ut illi ex factis tuis felicius, quàm ex Fastis lege-
rentur. Occupasti cum avito magni Cancellarij corde
cor Poloniæ in signatrice, legumq; Custode Cancellaria
Gemma, Albrachto, dicere debui Sacrationis Purpuræ
Alexandro dilectus Hæphæstion., Cancellarioq; signa-
culo, & Regias olim JOANNIS III Gratias, & Pe-
ctus avitum Magni Cancellarij, Tibi æternum confi-
gnasti: Quid enim non consignares Regias Præfuleasq;
Tibi gratias; postquam validam meritorum manum
sigillatrici Gemmæ admovisses; manum inquam illam,
quâ gloriosissimus Tui Territorij Aquilifer, triumphalia
signa Aquilasq; nunquam non fortunati boniq; omi-
nis, Deo, Regi, & Patriæ explicasti.

*Felix ille Parens, qui Te securus Olympum
Succedente tenet; quàm latus ab æthere cernit
Se factis crevisse tuis.*

Tene feliciter prodroma Majorum Insignium signa tua
Magne Signifer, avitiq; muneris signaculis, cor Patriæ,
supremarumq; in patria dignitatum Tesseræ, Tibi
consigna feliciter.

Per-

Claud. de
texto Con-
sulatu Ho-
norij.

*Perge - quò certis vocat inclita Gloria signis,
Exspectatq; suum sudoris filia civem.*

Vivite Magna OSSOLINSCIANÆ Domûs Columina
CASIMIRE, FRANCISCE, MICHAEL, ADAME,
JOANNES,

Vobis & Vestris meritis fœderatus militet æther,

Et conjurati veniant ad præmia Divi.

Philosophus interea OSSOLINSCIANUS anteaëctis sæ-
culis cum admiratione spectatû, & cum eadem seræ spe-
ctandum posteritati, unum inter mille Ossolinscium
Apelli similior, quàm Aristoteli proponit. Et in legati-
one unius, innumera Ossolinsciorû decora, merita, ac
virtutes in decus ac præsidium Capitoli OSSOLIN-
SCIANI attollit, tu Polonia Magni Civis, Senatoris
optimi, Legati maximi, etiamnum post fata supersti-
tem majestatem intuere.

LEGATIO SOLENNIS

Celsissimi S. R. Imperij PRINCIPIS

GEORGIJ OSSOLINSKI

Ducis in Ossolin, Comitis à Tenczyn

Supremi Regni Poloniæ Cancellarij,

EXCERPTA

*Ex Everhardo Wassenbergio de gestis Vladislai
IV. Polonia Regis part. 2. lib. 1.*

Solennitatibus Coronationis peractis, more Impera-
toribus Regibusq; Christianis consveto, de obedi-
entia summo Pontifici exhibenda Poloniæ Rex Vladi-
slaus IV. cogitare cæpit, quam præstare quidem cer-
tissimum erat, sed per quem, in deliberationem venit.

Opor-

Oportebat enim talem esse, qui Regis Septemtrionalium maximi, majestatem, eminentiam, & magnitudinem, moribus suis referret, qui triumphos & victorias ejus, tum & liberrimæ gentis magnanimitatem, generositatem sua exprimeret, & deniq; talem, per quem Vladislæus & Polonia loquerentur. Itaq; Rex non minus judicio, quàm imperio maximus, cæpit oculos suos circumferre ad opus, & cum plurimos in fortunata hac parte Polonia dignos intueretur, unum tamen ex omnibus Georgium Ossolinski legit velut opportuniorem. Quem virum, quia non tantum tantæ circa se Regis opinionioni respondit; sed perennem etiam terrarum orbi, inusitata hac suæ legationis dispositione, splendore & ordine stuporem illisit, circa rarum, velut unâ rapti curiosius aspiciemus.

Ut primùm ergò hic Princeps Ossolinski, hoc Legationis officium Romam jussu Regis sibi subeundum sensit, statim ad media, quibus tanti Regis, à quo mittebatur majestatem, victoriarum & triumphorum gloriam, prudentiæ ac magnificentiæ famam, divitias, viros & arma, quasi primo intuitu spectatrici Romæ, veluti compendio terrarum orbis ingereret, animum vertit. Ad quæ multa consideranti tria potissimum necessaria videbantur. Primò ut comitatum & famulitium legeret, probitate, moribus, corporis proceritate aut authoritate vultûs muneri suo conveniens, & ex quo singuli, sicut ille Regem, se loquerentur, non nescius ex horum compositione judicium de Rege, de Regno, de Legato sumi. Secundò ut omnes secum veste patriæ uterentur, tum quia nihil in illa foeminei, & procul ab omni mollitiæ magis venerabiles viros proponit, & militares animos virilius exprimit, tum etiam, quia nunquam antea Romæ visa, ipsa sui novitate tractos in curiosiorem considerationem intuentium oculos recrearet. Non ignorabat enim prudentissimus Princeps, si

peregrina Occidentalium Nationum veste uteretur, langvidius homines concursuros, nihil ampliùs quippè visuros, quam quod quotidie præter oculos iret. Itaq; Ossolinus Princeps omnibus eadem magnanimitate, qua conceperat in effectum deductis, longinqui tandem itineris seriem feliciter auspicatus est. Et quamvis non lentè procederet, non ante tamen quam anno 1633. 20 Novembris Romanæ urbis territorium attigit, cui statim octoginta sexigæ Cardinalium, & Romanorum Equitum, cum Cardinale de Torres, amplissimi Poloniæ Regni Protectore, octo ultra Pontem militum milliaribus Italicis obviam prodierunt. Cùm autem Summus Pontifex Urbanus VIII. gravi tunc temporis catharro decumberet, peracto mutæ salutationis officio ab eodem Cardinale de Torres, aliquot Roma milliaribus, versus Portam Flaminiam ad Palatium Julij III. deductus est. Inde assumptis comitum suorum præcipuis, ipse cum Cardinale de Torres, rheda Cardinalis Barberini, incitante Filio Marino Cameræ ejus Præfecto, exceptus Romam properavit, ut Summum Pontificem privato nomine saluaret. Quod disertissima oratione, & concinnatis in miram officiositatis speciem verbis ex tēpore faciens, statim prima quasi superficie rerum, amorem Summi Pontificis, nec non eximiam Eloquentiæ laudem meruit: adeo etiam ut Summus Pontifex summopere dolere se diceret, quod infirmitate impeditus, non statim pro voto suo, gratissimo ejus solenni ingressu frui posset. Cæterum absoluto privatæ salutationis officio Princeps Legatus ad Palatium Julij III. redijt, & quoad publicæ legationis suæ munus inter felicia sua numerâvit, quòd ob valetudinem Summi Pontificis aliquot diebus solennem suum ingressum suspendere copia fieret: tum ut longinqui itineris nauseam, tali præsertim tempore anni cum comitatu suo optata quiete decoqueret, tum etiam ut
meli-

melius omnia ad solennitatem, & per otium quasi disponeret, diem sui ingressus, quem alias casus pro placito daturus fuerat, electurus: deniq; ut Romani, quibus quidquid post Criquium aliquis conaturus erat, vile videbatur, per occasionem instar præludij nunc inusitatorum vestium novitate, nunc his, nunc raritatibus alijs ad splendorem solennitatis totius & curiositatem, mutua invicem relatione irritarentur. Factum est ut Princeps judicaverat, & ea curiositas animos Romanorum invasit, ut in spem futuri splendoris Roma erigeretur.

Itaq; Princeps Legatus videns omnia ad intentum suum adolevisse, & valetudinem Summi Pontificis in melius ire, tandem 27 Novembris (qui erat dies Dominicus) tempore pomeridiano ad mentem Summi Pontificis ante Palatium Julij III, suos in ordinem ritè disposuit. Quod ubi Romæ vulgatum, innumerabilis hominum multitudo portis ad spectandum effusa est. Quin imò & omnis Romana Nobilitas, Cardinales, externorum Principum Regumq; Legati honoris gratia aulicos suos in occursum misere. Adeoq; & Romanus Pontifex ipsum aulæ suæ Præfectum Faustopoli, Amasiensem Archiepiscopum cum Cubicularijs omnibus & famulatu obviam ire jussit. Et hac tam mirabili rerum facie, Princeps Ossolinski Vladislai IV, Poloniæ & Sveciæ Regis Legatus, Porta Flaminia Romam ingressus est. Præcedebant duo Nobiles Poloni in Attalicis vestibus coccinei coloris, quos sequebantur currus viginti duo panno rubro pretiosissimo texti, & stemmatibus varijs Principis Legati comitatus insigniti, quos sex muli singulos trahebant. Post currus decem Cameli, ex quibus dromedarij quinq; rubris tegumentis Attalicis purissimò auro prætextis, amicti, à Persis & Armenis ducebantur: his vestis erat oblonga aureis filis intertexta, more Turcico caput texti, dein-

de Tubicines Polōnici quatuor in viridi veste. Attalica ad plantas pedum usq; pendula, cum stemmatibus pretiosissimis Principis Legati equitabant; quos triginta quatuor Cosaci, in vestibus Attalicis coccinei coloris, & pennati more Polonico sequebantur: quorum terga equitatus Summi Pontificis & Cardinalium muli claudebant.

Modico ab hisce divortio viginti Ephebi, pulcherrimis Attalicis vestibus coloris cærulei, pharetris insuper Orientalium more, alijsq; sumptuosissimis militaribus armis decori equitabant. His præcessit Chociszewski ætatis provectæ homo, clypeum & sagittam Persarum more manu tenens, alis etiam ad Ephippium alligatis in splendidissimo habitu, adeo auri gemmarum ac lapidum pretiosissimorum numero ac varietate lucens, ut spectantium mirabili fulgore verberans oculos, in stuporem pariter animos unà raperet. Ducti post Ephebos hosce quinq; Equi Turcici generosissimi, quorum ephippia & ornamenta omnia, auro purissimo pretiosisq; lapidibus, ad invidiam usq; resplenduere. Primum Ephippium solis adamantibus erat distinctum; secundum eranis, pyropis tertium, quartum varijs pretiosis lapidibus, quintum fere inæstimabile solis adamantibus erat refertum; præcipuè verò peristroma, quod ob multitudinem adamantum dignosci non poterat. In fronte insuper equi, quoddam quasi monile fuit, quod viginti millibus scutatorum, Polonicalium verò florenorum octoginta millibus fuit æstimatum. Hi omnes equi, quod inauditum ab ullo sæculo, soleis aureis calceati fuere, ad fragilitatem omnes dispositæ; quarum duæ etiam per partes in vulgi manus venere. Equos autem hosce Persæ pariter & Armeni ducebant, eodem cum Camelorum ductoribus habitu superbi. Post hos, Principis Legati stabuli Præfectus, clavam argenteam manu premens, viginti ejusdem
Prin-

Principis Legati Cubicularios, frameis aureis, & alijs pretiosissimis armis spectabiles, duxit. Inter quos Gembicki, & Lipski Nobilissimi Adolescentes eminuerunt; quos sedecim aulici Hispaniarum Regis Legati, nec non & Cardinalium officiales, & variorum Christianorum Principum Legatorum familiares sequebantur.

Modico iterum post hos intervallo viginti principiores Aulici Principis Legati inæstimabilis pretij vestibus decori, equitabant, quos Jacobus Zelinski ejusdem Principis Aulæ Præfectus clavam argenteam manu gestans præcessit, cujus latera Nobiles duo claudabant. Inde Princeps D. Enrichemont, Criqueij, Galliarum Regis, Legati, cognatus, magno Gallicorum Nobilium numero comitatus, sequebatur; cujus vestigia Cubicularij Summi Pontificis pariter Equites premebant.

Et jam ad præcipuos Principis Legati Comites ordo devenerat, quos Romani Equites bini & bini medios introducebant; ex hisce primus post Cubicularios Summi Pontificis Komorowski Cracoviensis Canonicus erat, quem tres germani Fratres Naruszewicz, Magni Thesaurarij Lithvaniæ Filij sequebantur. Post hos autem Wezick, Joannis Wezick Gnesnensis Archiepiscopi, Primatis & Primi Principis Poloniae Regni ex fratre Nepos, cum Christophoro Lanckoroński, & Stanislao Minozki S. R. M. Cubicularijs equitabat, quorum vestigia Carolus Corniat Principis Legati Nepos, veste lapidibus, & pellibus pretiosissimis superba, premebat. Inde Lipski Plocensis Canonicus, cum Roncallio Secretario Regio summæ doctrinæ & authoritatis viro sequebatur. Post quos Dobieslaus Ciekliniski Secretarius itidem Regis introducebatur, qui equo generosissimo Arabico vectus, stupenda quadam agilitate catenam auream in frustula minuta discerpfit quæ ad

equi peristroma pendens, anhelanti tandem & curiosæ plebi in spoliū cecidit. Hic veste insuper ad talos usq; demissa, & lapidibus multis pretiosis superba, intuentium oculos mira voluptate perfudit. Post hunc Zebrydowski natu minor in splendidissimo habitu Gallico, Potocki Palatinides Brastaviensis, Gosiewski Palatinides itidem Smolenscensis, & duo Firlei Palatinidæ Sendomirienses sequebantur: quorum vestigijs Comes Theodorus Tarnowski & Alexander Lubomirski Palatinides Russiæ compositis in admirabilem magnificentiam vestibus ornati insistebant. Novissimè Nicolaus Ossolinski, Ossolinij Principis Patruelis in longa & viridi holoserica veste, Zebellinis pellibus pretiosè subducta, & exterius lapidibus pretiosis ornata equitabat, cujus verticem Palatinides Calissiensis Grudziński, & Petrus Daniłowicz Præfectus Praesteinensis, ornamentis omnibus fere inæstimabilibus splendidi & generosissimis equis Turcicis vestī, claudebant.

Immediatè Legatum ipsum, Gembicki Gnesnensis Suffraganeus, hujus Legationis Secretarius præcedebat: qui latus ejus sinistrum prius stipaverat, sed, ad portam del populo, Reverendissimo Domino Faustopoli Amasiensi Archiepiscopo loco cesserat. Ita Princeps Ossolinski Vladislai IV Poloniæ & Sveciæ Regis Legatus inter hunc, & Cajetanum Patriarcham Alexandrinum, (qui dexteram ejus occupavit) medius, claudentibus latus ejus utrumq; triginta stipatoribus, unius coloris vestibus, & globis pennisq; argenteis Polonorum more ornatis Romanam urbem ingrediebatur. Vestis illi inferior pretiosissima Phrygia erat, densissimo plumata auro, quam viginti (ut ita dicam) simbræ, Polonicè vulgò Petlice adamantinæ, & globi viginti ex meris adamantibus decorabant. Framea ex auro purissimo erat, eranis & margaritis plurimis variegata, quæ sola quinq; millibus scutatorum, hoc est

est Polonicalium florenorum viginti millibus æstimabatur. Vestis superior longissima pariter Phrygia, in qua viginti adamantinæ fimbriæ, seu Polonicè Petlice & globi ex singulis adamantibus totidem. Equo Turcico generosissimo soleis aureis calceato vehebatur, cui ad caput pluma nigra solis adamantibus lucens. Cristæ auriculares verò ut & ephippium, stapedes & peristroma totum, gemmis varijs plurimis & pretiosissimis distinguebantur. Hunc ornatum Princeps Legatus propria corporis autoritate in immensum auxit. Et cum Romani equum, paramenta, & ornatum corporis Ossolinij Principis mirarentur, majorem tamen identidem ex vultu ejus voluptatem capiebant. Ibi frons læta, ridentes oculi, & facies integra ad temperatam hilaritatem composita. Deniq; cui deesse nihil eorum videbant, quæ à scrupulosis Politicis, ad Legatum optimum & absolutissimum requirebantur. Post Legatum Principem, Prælati, Equites, & Nobiles plurimi, aut honoris gratia, aut benevolentiam aliquam Polonorum experti sequebantur: Novissimè elegantissima Principis Legati rheda, Attalica viridi inducta, plurimo variegata auro visebatur. Hanc sex equi generosissimi Turcici trahebant, quibus aurigæ attalicis togis viridibus, infra plantas pedum pendulis infidebant.

Hac inaudita ab ullo sæculo pompa & magnificentia Princeps Legatus Portâ Flaminiâ ingressus Romam, ad Palatium suæ commorationi designatum deducebatur, factis aliquot etiam à deducentibus Romanis per nobiliores urbis regiones de industria gyris, quo curiosæ plebis oculi, insolita novitate & splendore diutiùs pascerentur. Tantus autem erat ubiq; concursus, ut aliquando etiam præ multitudine luminum, vix progredi Legatus potuerit. Ipsum Palatium (quod erat sub monte della Trinita) virgultis viridibus,

bus, & picturis artificiosissimis Poloniæ Regis Vladislai IV victorias, resq; gestas representantibus erat decoratum. Quod cum Princeps Legatus ingrederetur, omnia in circuitu castris S. Angeli tormenta in congratulationis & lætitiæ signum detonuere. Triumphum non legationem dices. Quamvis nec malè dictum iudicem, si utrumq; diceremus. Quippe cum eodem tempore Poloniæ Rex Vladislaus, Schismaticos Moschos à Smolensciji mœnibus in unam stationem abactos, & obsessores obsidens, ad supplicem deditionem paulatim fortitudine sua sollicitaret, quid aliud videri poterat, quam per splendidissimam hanc legationem, in Septemtrione cum vinceret, Romæ triumphare, sic est profectò. Nec aliter omnes postea comperta victoria acceperunt, quam uni Vladislao IV superos indulgisse, in tanto terrarum divortio & vincere simul, & triumphare.

Cæterum ut ad Principem Legatum revertamur; hic apud Summum Pontificem, eminentissimo Cardinalium Collegio septum, magna præsentia sui, nec magnificè minùs, quam Romam ingressus fuerat, hac oratione commissum sibi, à Serenissimo Rege suo munus legationis absolvit.

Venit iterum Romam Vladislaus Pater Beatissime, & qui nuper Barbaricis ornatus laureis, ad Tuos pedes venerabundus jacuit is, hodierna die triplici cinctus diademate, ante hanc Apostolicam Sedem Tuam, per me Oratorem suum supplex procumbit. Vladislaus inquam Poloniæ & Sveciæ Rex, ac Magnus Moschorum Dux, qui antequam regnaret, Regum ac Regnorum Tyrannos debellavit, qui Romam triumphator sine triumpho ingressus, pia vota & Pontificiorum pedum oscula, triumphalibus prætulit, qui cum videri nosciq; maximè nolle, urbis & orbis oculos in se convertit: qui nova Tyberim felicitate beavit, cum citra

Rhe-

Rhenum fluere solitum invicta dextera, ultra Tyram ac Boristhenem traxit, qui deniq; desertori populo, Græcum Constantinianæ donationis diploma, è superba Gaza eripuit, tanquam pro Romano Pontifice pugnasset, cui Romam, hostium etiam spolijs asseruit. De hoc tali, ac tanto Principe, tibi Pater Beatissime non in cunis, sed in ipso gloriæ ac rerum gestarum fastigio, non fama, sed aspectu ac familiaritate noto, quid in hoc amplissimo orbis theatro asseram, haud reperio. Jam enim olim sapientissimo Tuo judicio omnes ejus penetrasti ac percensuisti virtutes, easq; uti probè cognitas, quæ liberæ Gentis sceptrum moderentur dignas judicasti, cum non ita pridem Vladislauum unum esse, qui Polonis imperare queat, solenni commendatione asseruisti. Huc ergo potius mea deflectat oratio, ut quos, qualesq; populos tibi, Sanctæq; Sedi tuæ supplices Rex noster secum offerat, declarem: quod dum exequor Pater Beatissime, Paterno affectu favebis Filij Pontificatus tui, natu minimi, gloriosis conatibus. Solenne enim Patrum est, eorum gestis potissimum recreari, quos recentiori sive lucis, sive gloriæ partu, orbi ediderint. Quidcunq; ergo Gentium Septentrio tegit, quàm latè à Carpathijs montibus ad Caspium mare, à glaciali oceano ad Pontum Euxinum patet Europa, totum id genuflectente Vladislao, ante thronum tuum proster nitur Pater Beatissime. Omnes enim illæ Gentes, aut liberis suffragijs eum sibi Regem dixerunt, aut hereditario jure, licet refragæ ad ejus spectant Majestatem, aut deniq; armis subactæ Dominum recognoscunt. Sed primum meritò locum obtinet Polonia, quæ uti Principibus suis liberè paret, ita Religionem & Sacra nulla vi, nullo metu adacta colit. Illa, illa Sarmatia Romanorum armis impervia, Romanæ Religioni mancipata; illa tot olim superstitionum Altrix, nunc unus Dei serva, illa libertatis custos acerrima, nullius ju-

gum experta, Romanis Pontificibus eorumq; Sedi Apostolicæ obsequentissima. Polonia inquam, quæ sola monstra non parit. Nulla inde Hæresis, nullum Schisma, & si qui vicinarum gentium peste afflati; acerrimo legum supplicio, & perpetuæ infamiæ notâ, à reliquæ Nobilitatis corpore rescinduntur. Si quis legem Vladislao Iagellone Rege, latam, totius Nobilitatis patrio more consensu firmatam, legerit, fatebitur nullius Concilij anathema acrius Hæresim perstrinxisse. Et quamvis iniquitati temporum, amoriq; consanguineo aliquid indulgisse videamur; non tamen legem abrogari unquam passi sumus, nec patiemur, testaturi posteritati, nos legum Patriæq; salutem unius Religionis integritate firmare. Hoc ipso lugubri nuper Reipublicæ statu, cum Sigismundum Regem, vivam pietatis Religionisq; imaginem cælo receptam, terris ereptam planximus, vidisses Pater Beatissime, illis ipsis centuriatis Comitibus, Senatam, Populumq; Polonum, magis pro Religione adversus concives suos dira hæresi corruptos certantem, quam de communi Patriæ salute, aut de futuri Principis electione sollicitum. Equavit fervor Procerum, curam Antistitem, eorumq; & tui Apostolici Nuntij solennes excivit gratiarum actiones. Innatum scilicet Genti Polonæ, avitæ Religionis studium. Hinc illa erga Sacrorum Præsides observantia, quæ eis prima in Senatu subsellia detulit, & præcipuas Reipublicæ partes curare jussit. Tacebo prodigam ut ita dicam in Templorum ædificia ac ornamenta liberalitatem. Omittam cultum Numinis & sacrorum ferventissimum, hæc enim omnia ita se habere orbis consensus asserit. Animorum certè gentis ejus magnitudinem, vel inde colligere licet, quod à tot sæculis adversus feros & immanes Nominis Christiani hostes excubent: nec stationem deserant. Ottomanorum signa, quæ tot acies, tot urbes vali-

validas, expugnârunt, tot montium claustra penetrârunt, fluminumq; impetus superârunt, tot Christianorum copias fuderunt, nuda Polonorum pectora stiterunt, & ne patentes ac pervios ingrediantur campos hucusq; prohibuerunt. Scythicam pernecitatem, ne universam quaque versus pervagetur Europam, unicæ Reipublicæ nostræ moratur Provincia. Moscos solo nomine Christianos, re & moribus quibusve Barbaris execrabiliores, toties vicimus, fudimus, & demum nobilissimam ejus Regionis partem in Provinciam redeimus. Hæc omnia summa animi magnitudine ac prorsus Romana steterunt. Parentavimus siquidem antiquæ urbi, Majorum nostrorum ferociâ læsæ, cum in ejus mores & instituta transivimus. Hinc libertatis studium, hinc æqui, juris, ac legum amor, hinc masculæ frugalitatis exempla, nil in moribus, nil in habitu corporis molle, vel effæminatum, nil acu pictum. Juventus pretextam, non in Cytharædorum gymnasijs, sed inter castra deponit. Equitibus rura paterna colere haud pudendum, ne urbanis enervati delicijs bello fiant ineptiores. Humiles domos plerumq; habitant, sed excelsos animos fovēt, non propugnaculorum, non pontis sublicij sed legum & innocentiae præsidio tuti. Neq; verò hanc magnanimitatem, ferociam quispiam dixerit. Cicurârunt Sarmaticam, si quæ fuit, feritatem Religio, & Musæ Latinæ. Has ubi è Septemtrione devolutæ Gentes Latio moverunt (credo equidem) castra secutas eiq; vitæ assvetas Heliconi suo prope ultimum vale dixisse. Gentem profecto nostram adeo sibi mancipârunt, ut sine earum præsidio & ornamento militarem gloriam minus gloriosam æstiment. Et meritò: earum enim beneficio libera Nobilium capita de se ipsis decernunt, magno Nobilitatis ornamento. Neq; à scholarum cathedris interpretes petimus, latino freti eloquio, quod una

cum moribus & institutis in partem gloriæ nostræ lubentes assumpsimus. Talis itaq; & tanta Polonia ad tuos pedes prima procumbit Pater Beatissime, illud collū nullius unquā jugū ferre solitū, illas manus liberas, illum animum excelsū & ad imperandum natū Regis sui exemplo, Majorum instituto tibi submittit, Tuis auspicijs se Vladislaum Regem dixisse, ac proinde eum tibi debere profitetur. Tu enim Geniales Divos, Primum ac Felicianum Romā discessuro in Sacris Cineribus tribuisti, non sine Pontificio omine, cum primum Regem nostrum fore sine æmulo, felicissimum, qui conjunctissimis tam populosæ Gentis animis & suffragijs Rex diceretur. Tuis ergo auspicijs Pontificum maxime, habet Vladislaum Polonia, Vladislaus Poloniam, Tu utrumq;. Habebis Deo favente, Vladislai invictā dexterā, tandem aliquando Tibi sanctæq; sedi Tuæ mansvefactos Scandicos rebelles leones. Habebis & desertores communis Pastoris ad tuum ovile propediem reduces. Exivit enim Pater Sancte, Filius hic tuus, non ætate aut meritis, nec majestate, sed capestitæ Regiæ dignitatis tempore, minimus, ad venationem, ut te satiet, famemq; tuam impleat avidam gloriæ summi Dei: inde longævi auspicaturus primordia imperij, unde cæli & Ecclesiæ ruinas sperat reparandas. Erige hanc tuam Dexteram Pontifex Optime, Maxime, qua nescio quo turbine motum ac pene ruentem orbem retines, summo hujus sæculi bono dudum destinatus, & sancta benedictione proseguere tam chari pignoris pios conatus. Excitabuntur hoc præclaro exemplo reliqui Christianorum Principes, & postpositis perniciosiis eorum nomini & gloriæ odijs, illuc arma convertent, quo nefarij Imperiorum prædonis libido, jam tandem vindicanda vocat. Vladislaus

certè


certè Rex uti nunc, se, Regnaq; & arma sua sancti-
tati tuæ tradidit; obedientiam præstat, neq; se ab
hujus Sanctæ Sedis Auctoritate & observantia un-
quam discessurum profitetur: ita Te Duce, Te Au-
spice, paratus semper erit Christianorum Aquilas,
notis sibi itineribus non sequi, sed præire.

Ferunt à plurimis annis, Legatorum neminem,
ab Eminentissimo Cardinalium cætu, ob singularem
eloquentiam Principis, tanto cum gustu fuisse audi-
tum. Quin imò & ipsum Summum Pontificem di-
xisse fama est, credere se Ciceronem pro rostris
melius, & majori Populi Romani cum voluptate non
perorasse. Ut ut sit, hoc certissimum est, & sum-
mopere à Romano Pontifice fuisse dilectum, & Filij
unici titulo decoratum. Itaq; diebus aliquot maxi-
mo in honore habitus, eadem pompa & magnificen-
tiâ Româ in Poloniam tandem regressus est. Hoc
ei Famæ Genio tribuente, ut Romani ipsi faterentur,
nec fuisse unquam, nec fore fortassis, parem gloriâ,
ordine & novitate rerum omnium, Legati alicujus
ingressum. Adeoq; & sibi persvadebant, non unius
capitis, thesauri, & inventionis rem fuisse, sed ad
rei summam, Poloniam integram laborasse: cum ta-
men Princeps Legatus privatis fere sumptibus, hanc
admirabilem struxisse pompam dicatur. Quod faci-
lè sibi persvadebit, quisquis splendidissima Polono-
rum comitia viderit; in quibus quotquot Senatores
ferè, tot pompâ & magnificentia Reges orbis ob-
stupefcit. Desijt ergò Legatio hæc, sicut in æsti-
mationem Polonæ Gentis majorem, ita in laudem
Vladislai Regis maximam: ut qui toties, quoties
invicem inauditam hanc à sæculo solennitatem Ro-

mani

mani referent, toties recrudescente memoria, in
eorum animis triumphabit.

Ad M. D. G. B. V. M.
S. L. O. C.
Honorem.



IDEA

TRISMEGISTI POLONI.



Trismegistus, Excellentiae ac honoris agnomen est, Latinis ter maximum sonat, sic enim appellatus erat Mercurius, vetustissimus Ægyptiorum Princeps, hanc ob causam, quod ut Philosophos Sapientia, ita Religione Sacerdotes excelluerit, ac mox in Imperio administrando, omnes superiores Reges superaverit: Hinc à Sapientia, Religione, & Arte regnandi, dictus TRISMEGISTUS, id est TER MAXIMUS: nempe Maximus Philosophus, Maximus Sacerdos, Maximus Rex. Primus hic à Physicis, ad Divinorum speculationem se erexit, primus de Majestate Dei, & animarum mutationibus disputavit sapientissimè. Scripsit multa volumina, quibus arcana mysteria, & oracula panduntur. *Hæc Diodorus Siculus.*

Trismegistus Rex, Sacerdos, Philosophus, Maximus.

Trismegisti, id est ter maximi nomen, ab Ægyptio, ad Poloni Senatûs Dynastam ego transfero, utpote in quem mensura nominis tanti, trina, perfectissima scilicet nominis interpres, transit Magnitudo: Imò illa Magni Nominis umbra, (quid enim clarum, in cæca Gentilitatis nocte videas?) Orthodoxi Senatoris Magnitudinem adumbrabat; Trismegistusq; Pharius Polono, ceu Orienti Soli, Antelucana nebula præcurrit. Sapientia illa Gentilis, in supersticiosam Religionem, & Religio nulla, quia vana, in Regale Solium assurrexit, nec plus ultra. At in Trismegisto Nostro, Regalibus Soliis, celsior Orthodoxæ Religionis Sol, cognatarum Togæ Sagoq; virtutum splendoribus Illustrissimus, tantum supra veterem Trismegistum assurrexit,

rexit, quantum lenta solent, inter viburna cupressi. Nempe GALECCIANÆ Gloriæ, ad sublimia semper asurgenti, non aliud fundamentum, quàm super PETRAM, Senatoriæ Magnitudinis, Romana planè Ere-
ctio, Virtus belli, & Sapientia Pacis. Hinc veteri Ter Maximo, Major in Magno Palatino TRISMEGISTUS, nempe Maximus consilio SENATOR, Maximus prudentiâ & dexteritate agendi LEGATUS, Maximus arte bellandi MILES. Hinc & triplex Magnitudo GALECCIANA, nempe: SENATORIS, LEGATI, & MILITIS Maximi exoritur.

MAGNITUDO PRIMA
TRISMEGISTI POLONI
SENATOR.

*Inter Omina, Decora, & Fata
Senatoria.*

OMINA SENATORIA.

OMEN PHILOSOPHICVM.

Philosophus & Propheta, parum distant: Utrique futura sunt præsentia: hinc & solennis Philosophiæ Rationalis tessera: Propositiones de futuris contingentibus, sunt determinatè veræ vel falsæ.

Hanc præterea futurorum notitiam, derivant non rarò Theo-Philosophi ex Divinatione Spirituali, sic dicta, quòd instinctu afflatuq; Spiritus Sancti contingat. Quod etiam Gentilis agnovit Vates, dum cecinit: *Est Deus in vobis, agitante calescimus illo.* Dum SIGISMUNDO III, Poloniarum Regi natus esset VLADISLA-
US

US IV., PETRUS SKARGA Societatis JESU
STEPHANI & SIGISMUNDI Regum Ecclesiastes,

3.

integritate vitæ, & doctrinâ celebris; prophetico distante Spiritu, Sigismundo gratulabundus, hæc de Vladislao puero, optimus Senex, Cygneâ voce cecinit:

Deus Majestatem tuam auxit Vladislao filio, qui nunc diem quinquagesimum quartum agit: Is non tantum à Regibus, sed à Caesaribus & Monarchis altum ducens Sanguinem, maximâ Regnum universum spe, solatioq; implebit, si præsertim bona accesserit educatio, in qua totum situm est. Cujus ætatem

*Prophetia
Patris Pe-
tri Skarga
de Vladis-
lao IV.*

provehctiorem minimè me visurum existimans; cadaver namque meum, jam tumulo inclusum computrescere incipiet, aut penitus computrescet, antequam mente adolescat: maxima nihilominus ex ipsius ortu, perfusus lætitiâ, hoc interim ex Zacharia canam, Scriptum à me illi olim legendum relinquens:

Tu Filiole Rex Polonia vocaberis, populorum tuorum bono incumbens regimini, servies Domino Tuo, qui te creavit: Potens eris gloriâ Vladislæ, ut illam cum Natione simulq; populis efferas, & depressam erigas. Pietatem & fortitudinem imitaberis Vladislai Jagellonis, & alterius ejusdem Nominis Filij, qui pro bono Christianitatis, ad Varnam contra Turcas fortiter dimicans occubuit, ut cum Parentibus, populoque, sis benedictus in æternum, eaq; passim insonent voces: Beatus venter qui te portavit, & ubera quæ suxisti. Clarissimi Viri augurantis veritatem, subsequentiâ ostenderunt tempora; Nullus enim Antecedentium Regum, majori cum applausu Regium insedit thronum, ita ut concordî cœli terraq; voce ad tam amplum deposceretur imperium.

*Kabierzy-
cki Historia
Vladislai
IV. L. I.
fol. 10.*

Habet etiam hoc Natura Rationalis, ut ventura subinde mala præsentiat. Ita militi ad venturum fulmen sollicito, arma etiam lateris galeæq; tonare videntur. Sic non vano omine, Lacon aliquis suos milites præmonebat; Prandete, tanquam apud inferos cenaturi. Vladislaus Hungariæ Rex ad Varnam pugnaturus, cum ex ipso quæreretur, quo in loco se reficere vellet, re-

A 2

spondit:

Spondit: *Deus novit ubi cœnaturi sumus.* & eo ipso prælio occubuit 1444. Ante conflictum armando; cassis excidit, equus se arrexit, Sessore Rege excusso.

Virgilius
lib. I. Georgic.

Cromerus
lib. 18.

Secundo de futuris contingentibus ominari possunt Philosophi ex aspectu Astrorum: Unde Trismegistus apud Stobæum Lib. I. Stellas & Astra dixit *esse Deorum oculos*: ut enim oculi affectuum sunt indices, è quibus facile quid in animo lateat, licet colligere: ita qui scire vult, quo erga terrigenas affectu ferantur Coelicolæ, Astra inspiciat. *Sol tibi signa dabit, Solem qui dicere fas sum, audeat.* Hinc Ludovicus Hungariæ & Poloniæ Rex, nihil ferè inconsultâ Astrologiâ, solitus erat auspicari. Et Henricus Bohemus Cracoviensis Philosophus, ex aspectu Astrorum, vaticinatus est de filiis Jagellonis Regis; Casimirum quidem longævum futurum, sed infelicem, Poloniamq; multis ac magnis malis illo regnante afflictum iri; Fratrem verò ejus Vladislaum Clarissimum atq; Victoriosissimum fore, ac ni fata longiorem negarent vitam, multis gentibus imperaturum.

Cometa dignitatum præfagi.

Ipsos etiam Cometas, (de quibus Græcorum proverbium erat, *Nullum Cometam videri, qui malum non ferat,*) non rarò honoribus præfulsisse, testis est Plinius Lib. 2. cap. 25. qui scribit, Octavio Augusto Imperium capeffente, apparuisse Cometam, qui ideò, quòd faustus fuerit Augusto, in templo Romæ inter Deos est collocatus. Et Sabellicus Lib. 3. scribit ab alio Cometa, Mithridatis Junioris Majestatem prænuntiatam esse. Plura de his *Miraldus in Cometographia.*

OMEN POLITICVM.

Fortunatiùs nemo Senatoriæ Dignitatis ascendit Capitolium, quàm cui dignorum Curulibus meritorum prævolavere auspicia, & Sangvis purpuram coloravit.

ravit. Petat tumescentibus, non tam ab afflantibus
 Auris, quàm inflante Ambitione carbasus Delphos e-
 minendi cupiditas, ut à mutis Simulacris, vocem aut
 sudorem eliciat in Oracula: Consulat belluarum exta,
 aviumq; volatus; pulset effuso in cursum equo hono-
 ris metam; territus hisce monstrosis desideriis Honor,
 in Virtutis confugiet sinum & tutelam, nisi admittatur,
 periturus. Nempe, non in unum Neronem, *proiecit*
fortuna honorem, ut frangeret, Regiamq; Fasciam contulit, ut
malè sanum caput ligaret. Non in unius Caligulae pur-
 pura, suam ignominiam erubuit Honor, quòd Nobilis
 Virtutis proles, ignobile Ambitionis fiat mancipium.
 Est quædam apud Sinas dignitas, quæ appellatur HEU:
 Heu dignitas est, quæ indigno confertur; Præmium
 nos quidem virtutis honorem appellamus, at omninò
 debitum benè merentibus est: Immutat beneficii no-
 men qui meruit. Cosmus, Magnus Dux Hetruriæ,
 coronam rostro Aquilæ è cœlis delatam, hoc Lemma-
 te insignivit: *Iupiter merentibus offert.* Ita honores vir-
 tutibus & meritis cœlum defert; quòd Theodoricus
 Rex apud Cassiodorum confirmat Lib. 2. Epist. 28.
Tribuenda est justis laboribus compensatio præmiorum, quia
exprobrata virtus creditur, quæ irremunerata transitur, Athle-
tam populis, palma designat esse victorem, sudores bellicos, Ci-
vica corona testatur. Hoc demum Virtutis præmium,
 infra dignitatem ejus ostendit, Pyrrhus Epirotarum
 Princeps, cujus annulo hæc verba inseculpta fuisse tra-
 duntur: *Homini vitioso levis pœna est vitæ privatio; virtute*
præstanti viro, parvum præmium est totius Orbis Domini-
um. In Civitate Peloponesi, templum fuit dicatum
 Honori, in quo Statua ejusdem posita, sinistrâ Orbem
 Zephirinum præferebat, diadematibus Regiis, Sceptris,
 coronis, clavis, & aliis insignibus honoris onustum:
 dexterâ verò Statuam virtutis crystallinam gerebat, au-
 reo torque colligatam, à quo hæc literæ auro fusæ de-

Thesaurus
 Comes.

Trigauius
 lib. 4. c. 6.
 f. 45.

Cassiodorus
 lib. 2.

P. Castmi-
 rus Kora-
 lovicz In-
 stitutionum
 Rhetorica-
 rum Parte
 Secundâ.

pendebant: *Tibi uni, & soli.* nempe militat honor. Carolus Fridericus Dux Cliviaceus & Juliaceus, pinxit Solem curru quadrijugo vestum, cui adstabat Mercurius, tenens manu Caduceum, in cujus fastigio insidebat columba, & à Genio advolante accipiebat coronam, cum Inscriptione: *Virtute & meritis, dignos ad sidera tollo.* Umbra naturam in omnibus imitatur honor, ut qui nihil sit aliud, quàm virtutis umbra, dicente Tullio: *Et si nihil in se habet gloria, cur expetatur, tamen Virtutem tanquam umbra sequitur.* Magnarum mentium hoc proprium est, nusquam timidiore videri, ac præsente Honoris umbrâ, id quod in Elephante spectare licet, qui uti belluas omnes corporis mole antecellit, ita umbræ propriæ ad eò pavidus fertur, ut ne eam aspicere cogatur, bibiturus aquam prius pedibus turbat. Philosophi cujusdam, hac super re testimonium subijcio: *Elephantem dicunt, non prius bibere, quàm aquam proboscide collutulaverit.* Nec fictum est quod dicitur, Exhorret umbram sui in aqua visam Elephas. Quapropter & Indi, illunem & obscuram noctem observant, quando hoc animal transfretare volunt. Ita insignes animæ, vel umbram Honoris formidant, fugiunt, non tamen effugiunt, sequitur illos Honor juxta Poëtam:

Insequeris? fugio: fugis, insequor.

Adsit suffraganti virtuti, cœli suffragium, & è privatis umbris, è desertis latibulis ad Solem publicum, à Stiva ad Sceptra, ex agricolis Reges vocabuntur, & in medijs Consul quæretur aratru. Offeret providum cœlum, Polono Piaſto, geminos ad agrestia convivia peregrinos, ceu totidem Ducalis Mitræ auspices. Suggestet Premisso, galeis per vertices arbuſtorum dispositis strata-gema pulchrum, Germanica & Moravica castra, à limitibus Poloniæ abigendi. Diriget Lechi passum, in agone fraudulento, ad evitandos infixos terræ clavos,

& ecce

Cicero L. 1.
Tusc. quæst.

Clandianus.

& ecce bubulco stimulo, profundæ Regiæ Piaſtorum
Majeſtati figentur radices; & Aurifabri, Regiæ Fortu-
næ Fabri, ab incude ad Regale Solium ſublimabuntur;
& à cultura Soli, ad incolenda Solia, purpurati proce-
dent Agricolaæ.

*Feffos duxit heri boves,
Dat magnis hodie jura Quiritibus,
Et quæ bobus ademerat,
Imponit Gabijs, & Curibus juga.*

Sarbievius.

Ita trabeas ad Stivam induit Serranus, Curius hodie
meſſem collegit, alterâ luce, hoſtium ſpolia Capitolio
inexit. Fabricius, Quintus, ante boves ſteterunt
vomere terram proſciſſuri, cùm eos trepida Roma bel-
lo præfecit: aratrum urbibus inferre juſſos.

*Sic in agro, flavam reperit quandoq; coronam,
Et non præviſos, paupertas ſedula Faſces,
Cum ſubito Tauris, Pirenaoq; relicto
Vomere, Liſtoris properè mandata ſecutus,
Centonem Lacerum, trabea mutavit Arator.*

Balde.

Ita, virtutis auſpicia ſequitur honor, ſic expansis com-
plectitur obvius ulnis; nec gentilitia ſidera reſpicit, ſi
virtutis prodromus Sol illuxerit. Hanc in conferendis
Magiſtratibus ſpectent Principes; hanc ſpectabat The-
odoſius Magnus, de quo Pòëta,

*--- --- Lectos ex omnibus oris
Evektis, & meritum non quæ cunabula quæris,
Et qualis, non unde ſatus.*

*Claudianus
de laud.
Stiliconis
lib. 2.*

Indignus enim honore, detitulat titulos quos gerit, hono-
noratisq; ſe inhonorat inſignibus, & pulchro deformat
amictu. Rectè quiſpiam honorem immeritò collatum
expreſſurus, Aſinum inter Equos, Leones, Pardos, Ele-
phantos, cæteraq; nobiliſſima animalia, ſolum corona-
tum propoſuit, cum Lemmate: *Non eſt præſtantior inde.*
Nempe indigni & idiotæ, dignitatem adepti, non eva-
dunt præſtantiores. Quid, quòd ambitioſi honorum
compe-

competitores, absq; adminiculo meritorum, tolluntur
in altum, ut lapsu graviore ruant? Nempe, ut ait Seneca,
cereis pennis in sublime vehuntur, ubi propè Solem
quæsitæ gloriæ steterint, Icarum mundo dabunt. Rectè
de talibus alter Pòeta:

Dares lib.
I. belli
Troiani.

--- Venales quisquis mercatur honores,
Vnde ruat, tabulata fruit.

OMEN HISTORICVM.

S Olenne est præcoci sua in beneficia cœlo, prodromis eadem, priusquam conferantur, evulgare præfagiis, nec prius ea Orbi ostendere, quàm non vulgaribus ostentis præmonstrârit. Cœlitum suffragio destinatus, non prius in terrigenam descendit honor, quàm prævius fortunatorum ominum comitatus præcesserit. Prævolant in Avibus, prælucent in Sideribus, præcurrunt in bestiis, infantilibus illigantur fasciis, imprimuntur teneris membris fortunata omina, ceu gentilitiæ faventium Cœlitum notæ, priusquam notatus his Honor, suum teneat Candidatum. Non dedit cœlum, vel ipsi Romæ, illud Augustum raræ pacis Nomen, quin prius infantiles Cæsaris cunas, parituræ Matri quieta sub imagine somni, amœnissimo Solis spectaculo prælustraret. Prius Leonem Agariste vidit, quàm suscipere Periclem, expansam Asiâ totâ Astyages vitem putavit prius, quàm Magnum illum Persiæ Cyrum educaret. Neq; hisce ad primas duntaxat cunas, beneficiorum dabatur securitas, datum id futuris etiam honoribus præfagium, eò quidem verius, quò non per somniorum umbram, sed vigili omnium documento, capaces honorum animæ suis Magistratibus aptabantur. Quippe dum Martiano illi, dum Basilio Macedoni, calentior Solis ardor famulantium expansis Aquilarum alis temperabatur, dum Aurelianus in Fasciis adhuc,

adhuc, antequam ipse honoribus Ara fieret, ludentis veluti Aquilæ blandimento, in ara deponeretur, quid nisi præfago augurio hisce singulis Imperiales tempeſtiva per obſeqvia, ſe ipſas Aquilæ demittebant.

In Caij Marii etiamnum pueri, infantili ſinu, ſeptem repertæ Aquilæ, ſepties illum futurum Conſulem nuntiabant.

Roberto Duci Normandiæ, Uxor Arleta pepere-
rat filium, & præſcio quodam mentis inſtinctu, ſuper nudum ſtramen depoſuerat; mox infans utrâque manu ſtramen ad ſe contrahere cæpit, tantamq; copiam coacervavit, ut totum ſe contegeret. Aderant tunc præſentes varii Principes, ex quibus unus ejuſmodi Omen protulit: *Fortunatus hic erit Princeps, coacervabit profecto multas Vrbes & Provincias.* Omen hoc implevit factis, poſtquam maturior ævo plurimas Urbes Angliæ abſtractas, ſuo Ducatui adjunxiſſet, inde vocatus *Gvilielmus Conqueſtor.*

Liberius.

Memorant Annales Henrici III. Imperatoris, de Hildebrando puero, quod cum filius eſſet fabri lignarii, ex ſarmentis ordine compoſitis, inſcius ipſe has literas coacervavit, quas homo literatus legere poterat: *Domina bor à mari uſq; ad mare.* Unde conjectans Divinum aliquid in puero, ſvaſit Parenti quidam, ut eum literis traderet: traditus profecit, & primò Cancellarius Regis, tum Senator factus eſt. Somnio admonitus Imperator de eodem, quod cornua videretur habere, quibus filium ſuum contereret, hominem in vincula conjecit, ſed ab Imperatore vinculis tandem liberatus, Cluniacenſe Monafterium eſt ingreſſus, indeq; ob vitæ probitatem ac famam doctrinæ promotus, primò Subdiaconus, deinde Cardinalis, tandem Summus Pontifex Gregorius VII. factus eſt.

*Annales
Henrici
III. & ex
ijs Crantzi-
um lib. 4.
c. 19.*

Carolus Borromæus, quâdam die abdiderat ſe primâ pueritiâ, in occulto caſtri paterni cubiculo, ubi

B

à famu-

*P. de Ber-
laimon in
Parad. Pu-
eror, c. 15.*

à famulo inventus est pomum in diversa secans. Interrogatus quid ageret? respondit, quid me à vobis quæri erat necesse, totus hic eram in orbe in varias partes regionesq; dividendo; quibus verbis omen colligebatur, eum magna quædam jam cogitare; implevitq; omen, cum Pii IV. tempore totius Ecclesiæ teneret gubernacula.

*Aventinus
in eius vi-
ta.*

Senis, Hetrusci Matrona Nobilis, cui Victoriæ nomen fuit, cum proxima esset partui, in somnis sibi visa est se puerum parere, mitram capite gestantem, fuitq; id præsagium non somnium, infantem enim enixa est, quem Pontificem Maximum Pii II. appellatione, vidit Ecclesia.

DECORA SENATORIA,

DECUS PHILOSOPHICVM.

Philosophia ex nominis sui ethymo, amorem Sapientiæ, Philosophus amatorem ejusdem sonat. Hinc Rationalis Philosophus à primis cunabulis adeo viæ ad Sapientiam, seu modis sciendi intentus erat, ut aliquid aliud agere, otiosum reputaret: ideoq; scientiam suam, postquam contemplativam vitam profiteri voluisset, tum illi tum sibi, pro instituto & fine, contemplationem modorum sciendi, ab omni rerum temporalium fæce depuratorum, & avulsorum præscripsit, postibusq; Lycæi sui inaravit: *Logica est Scientia modorum sciendi contemplativa.*

Jam si è sensu Philosophi, *felicia regna essent, in quibus vel Philosophi regnarent, vel Reges philosopharentur*; felix certè, imò terq; quaterq; fortunatus Senatus, quem Philosophi, id est Sapientes, seu Amatores Sapientiæ impleant. Nam esto Sapientiam Scholarum contem-

contemplationi concedamus, hoc tamen non obstat, quòd eam Senator, vel à Disciplinis Civilibus, vel ab usu rerum, vel ab aliqua Scientia acceperit. Hinc Cicero primò de Legibus ait: *Ei cui respublica commissa est, necessaria est Sapientia, quâ regat populos, quâ stabiliat Leges, quâ castiget improbos, quâ laudet claros viros, quâ hortari ad decus, revocare à flagitio, consolari possit afflictos.* Hinc Senatori, primò sùadet Pòëta,

Vt legat historias, authores noverit omnes,

Tanquam ungues, digitosq; suos.

Juvenal.
Satyr. 7.

Quia Historia, juxta Ciceronem, est testis temporum, lux veritatis, vita memoria, magistra vitæ, nuntia vetustatis. Romano subscribit Gallicus Senator: *Mentiantur Pòëtae, imponunt Rhetores, Historiæ partes sunt inter adulationem, & præruptam scribendi licentiam, ire quò jubet veritas.* Et alio loco: *Historia theatrum est, ubi quam in tempus gessere Personam viri Principes, perpetuò sustinent, ibi sua cuiq; virtus rependitur, sua item labes.*

Gramondus
Hist. Gall.
lib. 1. c. 13.

Secundò, qui ad Curiam & Rempublicam pertinent, Juris Patrii peritià excellant, est necesse. Quid enim est deformius, quàm de legitimis & Civilibus controversiis cognoscere velle eum, qui Legum & Juris Patrii est ignarus? Hinc & Satyricus Senatorem vult, *qui Iuris nodos, & Legum ænigmata solvat.* Neq; solum Leges sciendæ, sed etiam servandæ, non immutandæ: periculosa enim est rerum vel minimarum in Republica mutatio. Hinc Locrensiū Statutum erat: Si quis novam Legem excogitasset, eam prius populo recitaret collo fune obducto, ut si fortè Civibus perniciofa, & inutilis videretur, statim constrictus laqueus, Authorem novæ Legis strangularet, omnesq; hoc periculo admonerentur, ne temerè tentarent aliquam Legum mutationem: quia Leges dare promptum est, easdem verò exequi, hoc opus, hic labor est. Hinc Pòëta, quandam Rempublicam inducit de se loquentē:

Juvenal.
Satyr. 8.

Condidimus Leges quàm multas, quàm propè nullas,
Nam si servatur nulla, quid ulla valet?

Tertiò, perfectum Senatorem Eloquentiam Sapientiæ
adjungere, volunt Magistri Politicæ. Eloquentiam, in-
quam, quâ possit non tam Caduceo, quàm nomine O-
ratoris ornatus, incolumis vel inter tela hostium ver-
sari. Legimus enim non rarò facundum Senatorem,
disertâ Oratione, è manibus iratorum arma extorsisse.
Verissimè dixit Tullius: *Extorquet arma è manibus irato-
rum civium, boni civis auctoritas, & Oratio.* Plures, Re-
gna & Principatus Eloquentiâ, quàm fortitudine belli-
câ sunt adepti; plures etiam retinuerunt. Cæsar ipse
exemplo est. Ille cùm Miles in Patriam auctoratus,
esset ferox, quòd eodem scelere inquinati, etiam Duci
se æquatos jactarent, brevi oratione compescuit, atq;
ut ipsi supplicium de se caperent effecit.

--- Stetit aggere fulti

Cessitis, intrepidus vultu, meruitq; timeri

Non metuens, atq; hæc irâ dictante profatur:

Qui modò in absentem, vultu dextrâq; furebas

Miles, habes nudum, promptumq; ad vulnera pectus.

Hinc fuge, si belli finis placet, ense relicto.

Vadite, meq; meos ad bella relinquire satis,

Invenient hæc arma manus, vobisq; repulsis,

Tot reddet Fortuna viros, quot tela vacabunt.

Iam certè mihi bella geram, discedite castris;

Tradite Nostra viris, ignavi Signa Quirites.

At paucos, quibus hæc rabies authoribus arsit,

Non Cæsar, sed pœna tenet, procumbite terrâ,

Insidumq; caput, feriendaq; tendite colla.

Et tu, quo solo stabunt jam robore castra,

Tyro rudis, specta pœnas, & disce ferire,

Disce mori: tremuit sæva sub voce minantis

Vulgus iners, unumq; caput, tam magna Inventus

Privatum factura timet, velut ensibus ipsis

Impe-

Lucanus.

Imperet, invito moriturus milite ferrum.

Ita verbis facundis, ira & consternatio, & arma cesserunt. Nempe ut ait summus ille tractandorum animorum artifex; *Lupum ajunt auribus non teneri, at populum & Civitatem, auribus maximè oportet ducere.*

13
*Plutarchus
in Politicis.*

DECUS POLITICVM.

Ægyptii Proceres, Josepho Patriarchæ, ad perpetuam memoriam, Statuam erexerunt, sub nomine Serapis, cui ejusmodi affinxerunt figuram: Stabat Persona, omni planè habitu cultuq; spoliata, supra caput alterâ manu sustinebat vas ingens frumenti, cum minori in medio majoris vasis vasculo, ac mensura: alterâ manu tenebat clypeum, supra quem expressa spectabantur capita, quatuor animalium, in medio clypei caput Leonis, in parte una clypei caput canis, in altera lupi, totum verò clypeum, in gyrum sinuatus ambiebat angvis. Hoc schemate Ægyptii, munera prudentis expresserunt Senatoris. *Primò* proposuerunt eum vestibus spoliatum, quia Senatorem voluerunt, privatum esse privato affectu, capiteq; frumentum, id est commodum non suum, sed publicum sustinere. *Secundò* caput Leonis, significabat cor invictum ac impavidum. *Tertiò* caput canis, significabat vigilantiam circa bonum publicum: ita Symbolica Ægyptiorum Sapientia, Senatorem effinxit quibus Senatoris decoribus, adjicio decora alia, ceu Senatorium aurum auro.

PRIMUM DECUS Senatoris, est CLEMENTIA LIBERALIS; expressit hoc decus in se, Lotharius Cæsar, cujus Imperiali Coronæ, hæc impressa fuit inscriptio: *A vobis, præ vobis, pro vobis.* Hinc & suum Principem monet Claudianus:

*Sis pius imprimis, nam cum vincamur in omni
Munere, sola Deos æquat clementia nobis.*

Hugo Capetus Princeps Galliae, consulebat Veremundum Leodiciensem Antistitem, quâ ratione suam erga Ecclesiam probare posset pietatem? respondit Sanctus Præsul, *Sis, præsis, & prosis*. Principi ulterius sciscitanti, quâ ratione id faceret? reposuit Veremundus, *& Rhetoricè, & Dialecticè*; id est, & apertâ manu per liberalitatem, & contractâ in pugnâ, per propugnationem Ecclesiæ. Quod ille monitum integrè implevit, Deumq; mutuò liberalem erga se expertus est; nam per sexcentos annos, non interruptâ serie, thronum Galliae, Nepotes ejus tenuerunt. Hermo Bilio, Duci Corsicae, solennis erat vox: *Ecclesiæ sum Hermus largiendo, Bilio propugnando*. Hermus enim est fluvius aurifluus, bilis vero est humor cholericus ad bellum accendens. Solem quispiam vapores terreos attrahentem, postquam in tesseram Principibus proposuisset, inscripsit: *Colligit, ut spargat*. Alter Pelicanum, è venis suis sanguinem, in pullorum alimentum elicientem in Symbolum assumpsit, cum Lemmate: *Viscera visceribus*. Nempe concivibus & subditis: ita Clementia ac Liberalitas, Principum planè virtus est, ac insigne purpuræ decus. Errant ergo Pseudopolitici cum suo Machiavello, quorum hæc sunt axiomata: *Subditos preme, ne rebellement: eos tributis aggrava, ut eorum paupertate te dites & robores, metu eos opprime, oderint, dum metuant, eis vires, opes, & animos adime, ut servos tibi facias & mancipes, arcibus urbes doma, ut semper sint sub fulmine*. Vidit meliora, docuitq; Seneca Neronis Præceptor, qui ad eundem scribens Libro de Clementia: *Non est opus*, inquit, *latera montium abscondere multiplicibus muris, ac turribus sepire, Silvum Principem Clementia in aperto præstabit, crudelitas hostes multiplicat*. Theodosius junior rogatus, cur neminem eorum, à quibus lædebatur, puniret, respondit: *Vtinam liceret mihi & mortuos ad vitam revocare*. Metuatur ergo Jupiter Tonans, Fulminans, Ultor, sed magis colatur

colatur & ametur Jupiter Custos, Conservator, Opitulator, undè nomen habet scilicet à juvando.

SECUNDUM DECUS SENATORIUM est JUSTITIA, quæ juxta Platonem Principatum inter virtutes tenet, & est primum earum ornamentum. Optimates ergo, & quoscunq; à quacunq; fortuna in altum extulit, quæcunq; manus, *suum cuiq; tribuant, alienum ne vendicent, utilitatem propriam negligant, utilitatem communem custodiant.* Ita Doctor Mediolanensis monet. Meritò ergo Agesilaus, Justitiam cæteris virtutibus præferebat dicens: *Nullius usus fortitudinem futuram, quæ justitiâ careret, cumq; Persarum Rex laudaretur, nullo; inquit, ille major me, nisi sit etiam justior.*

TERTIUM SENATORIS DECUS est CONSTANS, suiq; semper similis in consiliis animus, prudens enim vir *commisissè cavet, quod mox mutare laborat.* Horatius. Agis cum in carcere ab Ephoro rogaretur, num eum poeniteat eorum, quæ dixisset? respondit, *se nullà tangi poenitiâ consilij cum prudentia honestoq; conjuncti, quicunq; sequatur eventus.* Aristides ex constantia planè Senatoria, summam meretur laudem, à quo, cum Dionysius Tyrannus filiam in matrimonium peteret, respondit, *mortuam se videre malle, quàm Tyranni uxorem:* eam occidit Tyrannus; cumq; iterum quæreretur, an ejusdem sententiæ esset? respondit; *factum dolenter se ferre, at dicto letari.* Catonis constantiam planè Senatoriam quis non mirabitur? quem nemo unquam, convulso per Cæsarem ac Pompejum Reipublicæ Statu mutatum vidit: idem color vultus, dum Prætorem ageret, dum repulsam pateretur, dum accusaretur, in Provincia, in exercitu, in morte, in illo deniq; Reipublicæ pavore, cum Pompejus victus esset, cum Cæsar armatus Victor Rempublicam invaderet; hunc cum amici hortarentur, ut ad clementiam Cæsaris confugeret, respondit: *devictorum esse, & eorum qui deliquissent supplicare, Catonem nec victum,*

vicium, nec captum esse, Cæsaremque honestate & Iustitia Superasse, proinde se pro Cæsare qui volent, rogent, pro Catone neminem orare debere. Hanc invictam animi constantiam, ex mascula Stoicorum doctrina derivatam, deprædicat Seneca lib. 1. de Constantia Sapientis cap. 2. *Qui stetit solus, inquit, & cadentem Rempublicam, quantummodo unâ retrahi manu poterat, restituit, donec abreptus vel abstractus comitem se, diu sustentata ruina dedit, simulque extincta sunt, quæ nefas erat dividi, neque enim Cato post libertatem vixit, nec libertas post Catonem.* Tali Senatorum constantiâ in consiliis, stare Respublicas asseruit Salustius: *Ego ita comperi, inquit, omnia Regna, Civitates Nationesque, usque eo prosperum imperium habuisse, dum apud eos vera consilia valuerunt, ubicunque gratia, timor, voluptas, ea corrumpere, paulo post comminuta opes, denique ademptum imperium, postremo servitus imposita est.*

QUARTUM SENATORIS DECUS est *concor-*
cum recte sentientibus Voluntas; idèò Senatus Romæ, potissimum in æde Concordiæ habebatur: Felix Senatus, cui inscribi posset illud Ovidii:

Nec refert, Dominos illic famulosque, requiras,

Tota Domus duo sunt; ydemque parentque, jubentque.

Igniti carbonēs tamdiu fervent, quamdiu sibi intimè juncti, à se mutuo incalescunt; mox ubi separantur, extingvuntur. Hinc illis quidam inscripsit, *Si distinguimur, extinguimur.* Apud Romanos, in amplissimi Sacerdotii Augurum Collegio, non modò amicitiam violari fas non erat, sed ne Sacerdotem cooptari licebat, qui cuiquam ex Collegio esset inimicus. Profectò nulla gratior, nulla carior, quàm ea quæ cum Republica est, Procerum necessitudo, nulla conjunctio optabilior, quàm publica muneris Societas, Unio hic quàm pretiosus, tam rarus est. Servandum ergo Scriptoris Ro-

Salustius. *mani monitum; jurgia, dissidia, iras, similitates cum hostibus exer-*

exerceant, Cives cum Civibus de virtute certent. Et alterius : Privata odia, publicis utilitatibus remittant.

17
Tacitum.

QUINTUM SENATORIS DECUS est AMOR BONI PUBLICI. Fortunata Senatoris Domus, cui inscribi valeat, illud Hadriani Cæsaris: *Non mihi, sed populo.* Lacedæmonii nec sciverunt, nec voluerunt privatim vivere. Hinc & Agefilaus, Persarum Regi, amicitiam suam ambienti, respondit: *fieri non posse, ut suâ privatim amicitia uteretur, sin inter omnes, etiam ipse locum haberet.* Damna summa, in suo Imperio tunc sunt experti Romani, quamprimum à suo desciverunt instituto, quando pauperes erant privati, tunc opulenta fuit communitas; quæ res ab Horatio querelam illam expressit:

--- Non ita Romuli
Præscriptum, & intensi Catonis,
Auspicijs veterumq; norma,
Privatus illis census erat brevis,
Commune magnum.

Horatius
L. 2. Carm.
Ode 15.

DECUS HISTORICVM.

CHARITAS IN PATRIAM PURPURATA. *Unicuiq; Patria Sua carior est, dum supra omnia saluum fere queritur, ubi ab ipsis cunabilis commoratur.* Ait Theodahadus, Gothorum Rex, apud Cassiodorum lib. 1. Epist. 2. ad Senatum Romanum.

Genutius Prætor Paludatus, cum portam Civitatis Romanæ egrederetur, novum & inauditum prodigium accidit; Nam ei subito cornua ex capite crescere visa sunt, responsumq; est illi à Vatibus, eum Regem fore Romanum, si in civitatem regrederetur, quod ne accideret, neve Libertas populi Romani læderetur, perpetuum sibi indixit exilium: Ob cuius rei memoriam, Romani portæ illi, per quam egressus est, caput æreum cornutum affixerunt.

Valerius
Maximus
cap. 8.

C

Co-

Codrus Atheniensium Rex, cum ingenti hostium exercitu, Attica Regio debilitata, ferro igniq; miserandum in modum vastaretur, diffidentia humani auxilii, ad Apollinis Delphicum oraculum confugit, perq; Legatos seiscitatus est, quonam pacto tam grave bellum discuti posset? cumq; idolum respondisset, tum demum illi finem fore, si ipse Rex hostili manu occubuisset, amore Patriæ, depositis imperii insignibus, assumptoq; Gregarii militis habitu, in furentium hostium globum sese injectit, unumq; ex iis gladio percussum, in sui cædem proritavit, fortiterq; victima Patriæ occubuit.

Insigne ac prodigiosum amoris in Patriam exemplum, tradit Valerius Maximus in duobus Philenis fratribus. Post diuturnam de finibus inter Carthaginenses, & Cyrenenses contentionem, communi Gentis utriusq; decreto, statutum est, ut ex utraq; civitate, duo Juvenes, statuto eodem planè tempore egrederentur, & ubi primum sibi obvii convenirent, ibi limites perennes figerentur: quia verò Phileni fratres, celerius constituto tempore suâ civitate egressi, latissimè limites suos prorogârunt, dum ideò Carthaginenses, eos de fœderum violatione arguerent, post longas controversias, tandem Carthaginenses Cyrenensibus hanc conditionem quasi impossibilem proposuerunt: ut si Phileni eo loco limites suos habere desiderarent, ambo simul in terminales quasi lapides, vivi defoderentur. Acceptata extemplò à Philenis conditio; viviq; statim defossi, se ipsis, ceu terminalibus Colossis terminos Patriæ extenderunt: quibus Epitaphii vice inscripsit Valerius Maximus lib. 5. *Qui quoniam Patriæ, quam vitæ suæ terminos longiores esse voluerunt, bene jacent manibus & ossibus suis Punico dilatato imperio.*

CONCORDIA PURPURATA. Theodahadus Rex Gothorum, Senatam Romanum ad concordiam exhortans, ita loquitur apud Cassiodorum lib. 10. Ep. 4.

Tan-

Tanquam in duobus luminibus unus est aspectus, & concordem sensum nemo credit segregatum, sic sunt similes, quos & gratia jungit, & parentela consociat.

19

Agelilaus Rex, rogatus à quodam, cur Sparta muris non cingeretur, ostendit ei Cives unanimes & armatos, hi, inquit, sunt Spartanæ civitatis mœnia, significans, urbes nullo munimento tutiores esse, quàm virtute Civium consentientium. Rursus Lacedæmonii, cùm de civitate mœnibus cingenda consultarent, Iſæus Sophista recitavit illud Homeri: *Scutum hæsit Scuto, galeæ galea, atq; viro vir; Sic state mihi Lacedæmonij, & muris cincti sumus.* Huc facit Symbolum Ottoberti Comit̃is Habsburgici, in quo cythara sustinetur, ab armato brachio, cum Lemmate: *Hæc mihi tuba;* quasi diceret, ad concordiam potiùs, quæ animorum est harmonia, quàm ad arma vocabo.

Ex Tuberorum familia, sedecim viri omnes simul in una æde, & quidem nimis exili, cum uxoribus & liberis habitârunt, nec ulla unquam audita est contentio.

Plutarchus
in Emilio.

Themistocles, imminentibus Græciæ Persis, persvasit omnibus Græcis, ut domesticis simultatibus in aliud tempus sepositis, contra Persas conspirarent, ratus interno & civili bello, nihil fœdius; nam fatalem quandam Reipublicæ semper minatur periodum.

Plutarchus
in Themistocle.

--- Scissura domestica turbat

Prudentius.

Rem populi, titubatq; foris, quod diffidet intus.

Ergo cavete Viri, ne sit sententia discors,

Sensibus in vestris.

JUSTITIA PURPURATA. Hanc Senatui Romano Theodahadus Rex ita commendat apud Cassiodorum lib. 10. Epist. 29. *Decet Regiam justitiam custodire, quod à judicibus benè agentibus fuerit ordinatum, ut nihil incautè, nihil venalitat̃is studio, fecisse videantur.*

Persæ Gentiles licet, summo studio colebant justitiam, hinc etiam duo tantùm in orbe peccata esse ju-

*Veberus in
discur. cu-
rio: & fru-
ctuos:*

Athenaus.

dicabant, quorum prius sit esse debitorem; alterum mentiri, quod obæratum plerumq; mentiantur, dum pollicentur in diem, nec præstant quod pollicentur *Erasmus Rot. Apophteg: lib. 3.* Id circò mutuam dans pecuniam, tres sibi conciliet Patronos. 1m. Iurisconsultum, qui contra recusantem restituere debitum, lege agat. 2dum. Theologum, qui conscientiam Debitoris extimulet. 3tium Militem, qui nolentem vi compellat. Aristides per varias civitates Græcas causas dijudicans, omnia munera repudiabat, cumq; illi necessaria etiam ad victum non superessent, purpuram suam venum misit, circumlata est per omnium Civium domos; in qua tandem summo pretio æstimata, faciem Jovis acu artificiosissimè exprimi curârunt, adjunctâ inscriptione; *Aristides Vir Divinus, purpuram exuit, ut Iustitiam indueret.*

Antigonus cum Athenas ad Tribunal venisset, cognovissetq; à populo thesauros abscondi ob metum rapinæ, proclamari mandavit, *cum gladio se venisse, non cum falce, non ad metendas fortunas, sed ad plectenda flagitia; cui populus reposuit: ô verè magnum Antigonum!*

*Fulgosus
lib. 4. c. 3.*

Tamerlani Tartarorum Regi, agenti iter, Arator vas ingens aureæ monetæ, in quod fortè arando inciderrat, obtulit: hîc quærit Tamerlanes, an patris sui effigiem ea moneta præ se ferret? ac respondentem Romanorum habere effigiem, subjungit: *Si hæc pecunia Majorum meorum non fuit, Aratori eam relinquamus, ad quem eam Deus detulit.*

LIBERALITAS PURPURATA. Theodahadus Rex, Liberalitatem veluti propriam, & characteristicam Senatoris notam agnoscit, apud Cassiodorum lib. 8. Epist. 49. *Consul debet ex liberalitate laudari, ne videatur aliud dignitas promittere, & aliud Senatorem velle complere. Quocirca sub opinione munifici, parum non decet inveniri, quia inumbrat famam publicam in Consule, tenacitatis obscuritas.*

Dyony-

Dyonysius cū palatium Filii sui ingressus, poculorum argenteorum & aureorum magnam multitudinem vidisset, exclamavit: *Non es Principatui aptus, qui tot poculis à me acceptis, neminem tibi amicum effecisti.*

21

Plutarchus.

Boleslaus Chrobri, tenuiores, litis finem expectantes, sumptu mensāq; suā sublevabat: fertur verò 40. mensas longas, exceptis minoribus aliis, quotidie apud eum solitas fuisse instrui, ad quas accumbere, volentibus licuerat.

Cromerus

lib. 3.

Jagello Rex tantā fuit liberalitate, ut non modò fiscum exhauriret, sed magnam partem possessionum regiarum, etiam immerentibus largiretur, ita ut Martinus V. Pontifex, mandārit Archiepiscopo, ut donationes ejus rescinderet.

TEMPERANTIA PURPURATA. Apud veteres duo maximè insignia amicitiae habebantur Symbola, Panis & Sal. Macedones cū amicitiae foedus inibant, panem gladio divisum, utrinq; gustabant. Sic Alexander, cū Rhoxanem in Conjugem ducere vellet, panem sibi afferri jussit, quem ferro dissectum, cum Sponsa simul libavit. Sic Cyrus junior, honoris causā, è mensa sua mittere solebat amicis, demorsos panes, ut iisdem vescerentur.

Lib

Jagello Rex adeò erat abstemius, ut totā vitā suā non nisi aquae potu uteretur. Hinc & Sigismundus I. Patris Aviq; instituto, aquam tantum bibebat, ad ultimam senectutem. Ingravescente verò ætate, ex Medicorum consilio, vino subindè utebatur, sed ita, ut nunquam cum quisquam ebrium viderit. Vitoldus etiam Princeps Lithvaniae, nil præter aquam bibebat. Ex quo vivendi genere, perseverabat in illis *mens sana in corpore sano*; Nesciebant vino fulcire vires cadentes, nesciebant saniem emittere, & diutinam ægrotationem, thermis sudoribusq; laxare, podagræ illis malum, imò & nomen ignotum, erat. Hinc abstinentiae beneficio,

Cromerus

lib. 20.

Cromer. in

Oratione

Funebris Si-

gismundi.

Cromerus

lib. 19.

vixit Marcus Antonius plus quàm 100. annis, corpore & animi iudicio robustus; Galenus 120. annis. Socrates, ob summam sobrietatem ac temperantiam, totam vitam sine ulla infirmitate exegit. Exemplar ergo Principum Otto Imperator, sapienter æquè ac rectè dicebat, *aut frugi oportet esse hominem, aut Cæsarem.*

FATA SENATORIA.

FATVM PHILOSOPHICVM.

Fatum juxta orthodoxos Philosophos, est complexio quædam causarum secundarum, quæ licèt ex se incertæ sint, ac variabiles, prout tamen subsunt Divinæ Providentiæ, infallibilem inferunt effectum. Fati hoc modo sumpti, descriptionem tradit Bôétius lib. 4. Consol. Prosâ 6. *Fatum est inhærens rebus mobilibus dispositio, per quam Divina Providentia, suis quæq; necit ordinibus.* Atq; ex hac Divina dispositione, rebus mobilibus inhærente, oritur.

FATVM POLITICVM.

Fatum Mathematicorum, insuperabili Siderum vi inclusum; Fatum Priscillianistarum, Deo ipso Omnipotente potentius, detestamur: Svavem Providentiam Dei, per medias causas, pro earum captu cuncta ordinantem, & sinentem liberis voluntatibus, liberum arbitrium non excutientem agnoscimus. Itaq; omnia, quæ ab impiis profano sensu dicuntur, repudiamus. Per Fatum ergo Politicum, intelligenda est Divina Providentia, suas improbis pœnas, præmia probis disponens. *Iudicat illa orbem terrarum in æquitate, & populos in veritate sua.* Quod enim necessitatem Fati esse, quod

se, quod fortuitum eventum, quidam interpretantur, Dei judicium est; hinc admirabiles & inopinatae rerum conversiones, nullus annus non insignis est, Potentum ruinâ, vel morte, imò nulla dies, quæ non aliquos, vesperi jacentes videat, quos manè viderat superbos. Deus hæc agit, cujus vindicta lento quidem, sed gravi passu procedit.

23

--- Premit ultio noxas,
Tunc gravior, cum tarda venit, tunc plena timoris,
Cum terrore caret.

Dares
Phrygius
lib. 6. de
bello Tro-
iano.

Et si bonis subinde adversa immittat Deus, castigat ut coronet, malos venturis malis reservat; veniet ad illos felices sua portio, quisquis videtur dimissus esse, dilatus est. Placent hæc ludenti in orbe terrarum Deo spectacula, ut aliis pro merito ruentibus, alii surgant; *lætis hunc Numina rebus, crescendi posuere modum, summis negatum stare diu.* Ita Superis commune est, inter ornamenta & dedecora homines, alternâ vice versare, tristibus læta, & lætis tristia permiscendo. Optima nimirum juxta Bôetium, *vindex insolentiae, varietas humanæ conditionis, commodissimus est tortor plectendæ improborum licentiae, rerum humanarum vicissitudo, pauperies carnifex affluentiae, servitus, Tyrannus libertatis, dejectio lictor superbiae; exilium vindex autoritatis vanæ & superciliosæ.* Rotæ in gyrum actæ quispiam inscripsit: *Alternâ vice.* Nempe homines Fortuna versat. Cornelius Scipio ex Consule captivus, ex captivo Consul factus est, quod Valerius admiratur, quis crederet illum, à duodecim Securibus, ad Carthaginiensium perventurum catenas? quis rursus existimaret, à Punicis vinculis, ad summa imperii perventurum fastigia? Hæc omniâ, Divinæ Providentiæ Orbis gubernatrici attribuimus, *nec te facimus Fortuna Deam, cœloq. locamus.*

FATUM

TRansitorium theatrum est Mundus, inquit Bonomius. Providus mundanæ Comitragœdiæ constructor, Prologum fletui commisit, priores actiones querimoniis, lachrymis, vagitibus; amor, fortunæ, honori, Scenas medias; morbo, spei, tremori extremas; tandem ne in fictionem fabula desineret, tragicum suspirium, toti finem imponere constituit. In hoc vasto mundi theatro, fatales quasdam intueamur Scenarum mutationes.

MUTATIO PRIMA.

Annibal à Scipione

(cum cujus Parente bellum inchoaverat) pacem supplex implorans, quam antè Parenti Scipionis negaverat. Juvat supplicem audire: Sic igitur Annibal ad Scipionem: *Si hoc ita fato datum erat, ut qui primus bellum intuli populo Romano, quig, toties propè in manibus victoriam habui, is ultrò ad pacem petendam venirem, lator te mihi potissimum datum, à quo peterem. Hoc quoq, ludibrium Fortunæ casus ediderit, ut cum Patre tuo Consule caperim arma, cum eodem primùm Romano Imperatore signa contulerim, ad filium ejus inermis, ad pacem petendam venio &c. &c. Quod ad me attinet, jam ætas, senem in Patriam revertentem, undè puer profectus sum, jam secundæ, jam adversæ res, ita erudirunt, ut rationem sequi, quàm fortunam malim. Tuam & Adolescentiam, & perpetuam felicitatem, ferociora utraq, quàm quietis opus est consilijs, metuo. Non temerè incerta visum reputat, quem Fortuna nunquam decepit. Quod ego fui ad Thrasymennum, ad Cannas, id tu hodie es. &c. &c. Novi vobis spiritus magnos magis, quàm utiles, & mihi talis aliquando Fortuna affulsit. Quòd si in secundis rebus, binam quoq, mentem darent Dij, non ea solùm, quæ evenissent, sed etiam ea, quæ evenire possent reputaremus. Ut omnium obliviscaris aliorum, satis ego documenti in omnes casus sum. Quem modò castris inter Anienem, atq, urbem vestram positis, ac jam propè*

*Livius lib.
30.*

prope scandentem mania Romana videras , hinc cernis , duobus
fortissimis Viris, Fratribus clarissimis Imperatoribus orbatum,
ante mania propè obfesse Patriæ , quibus terrui vestram ur-
bem, ea pro mea deprecantem. Maximæ cuiq; Fortunæ mi-
nimè credendum est. In bonis tuis rebus, nostris dubijs, tibi
ampla ac speciosa danti est pax, nobis petentibus magis necessa-
ria, quàm honesta.

Marius septies Consul Romanus , à purpura tan-
dem ad servilem lacernam, à Consularibus ædibus ad
carceres detrusus , & tot Laurearum victor in paludi-
bus Minturnensium delituit , & moriens Fortunam
crudelem inclamabat :

Ille Iugurthino clarus, Cymbrog; triumpho ,

Quo victrix toties Consule, Roma fuit ;

In ceno Marius jacuit, Cannâq; palustri.

Ovidius l.

*4. de Pon-
to Eleg. 3.*

MUTATIO SECUNDA. Ut taceam Reges & Cæ-
sares , in quibus Valerianus Imperator à Sapore Rege
Persarum captus, equum consensuro pro scabello fu-
it. Eodem modo Bajazetes Turcarum Rex, dorsum
præbere debuit Tamerlani Scythæ, à quo ferreæ inclu-
sus caveæ, circumductus est omnibus ostentui, & irri-
sui. Gilimer Vandalorum Rex , à Belisario in extre-
mas angustias redactus, panem, spongiam & citharam sibi
mitti rogavit. Panem sedandæ fami , spongiam tergendis la-
chrymis, citharam dolori leniendo. Ille ipse Belisarius, u-
triusq; fortunæ tam pugnâ quàm palmâ insignis , post
victorias de toto Orbe non semel relatas, in obscurum
carcerem detrusus, oculis effossis stipem rogare coactus
est. Baronijs ad annum 561. Secundus à Belisario, pro-
dit in Scenam Ruffinus, qui à Theodosio Imperatore
gloriâ & opibus auctus, Arcadio quoq; Tutor datus,
cùm Dominum suum Minorensem Imperio privare
meditabatur, proditione compertâ in medio conatu à
militibus Italicis est occisus. Caput cum dextera præ-
cisum, ante ipsas Constantinopolis portas pependit,

D

uxore

uxore ejus in exilium missâ. Hunc Claudianus duobus Libris infectatus acerbissimè, tandem exclamat:

Claudianus
lib. 2: in
Ruffinum.

*Desinat elatis quisquam confidere rebus ;
Instabilesq; Deos, ac lubrica Numina discat ,
Illa manus, quæ Sceptra sibi gestanda parabat,
Cujus se toties submisit ad oscula, supplex
Nobilitas, inhumata diu, miseroq; revulsa
Corpore, feralem quæstum post fata poposcit.
Aspiciat, quisquis nimium sublata secundis,
Colla gerit ; trivijs calcandus spargitur, ecce,
Qui sibi Pyramides , qui non cedentia templis ,
Ornatura suos exstruxit culmina manes,
Et qui Sidonio velari creditur ostro,
Nudus pascit aves : jacet en qui possidet orbem,
Exiguæ telluris inops, & pulvere raro
Per partes tegitur, nunquam totiesq; sepultus.*

Chronicon
Tragicum
Parte 2.
Anni Christi
268.

MUTATIO TERTIA.

Marius magnis viribus præditus, ex fabro ferrario Imperator appellatus, tri-duo tantum imperavit. Hunc insigniorem, brevissimum fecit imperium. Nam hic Consul, sex tantum pomeridianis horis Consulatum tenuit; hinc à M. Tullio tali perstringitur joco: *Consulem habuimus, tam severum, tamq; Censorium, ut in ejus Magistratu nemo pranderit, nemo cenaverit, nemo dormierit.* De hoc etiam dici posse videtur, qui unâ die factus est Imperator, aliâ die visus est imperare, tertiâ interemptus est. Occisus à quodam milite, qui cum ejus quondam operarius in fabrilis Officina fuisset, contemptus est ab eodem, addidisse hæc verba dicitur interemptor: *hic est gladius, quem ipse fecisti.* Cæsar Borgia cognomento Valentinus Romanus, à Patre Roderico postea Pontifice Maximo, in Cardinalium Senatum cooptatus erat, tandem à Toga Sacra, ad Sagum profanum conversus, contemnere Galerii decus, & Joanni Fratri, Gandiæ Duci, invidere cæpit; eò insanæ æmulationis exitu, ut ipso Fratre, quo cum

cum hilariter apud Matrem cœnauerat, jugulato, pro-
 jectoq; in Tyberim, se totum abdicatâ sacrâ purpurâ,
 & assumpto militari Sago, ad arma transferret, Gallis-
 què se conjungeret; tandem magnæ partis Italiæ Do-
 minatum affectare cœpit, adeò dirâ cupiditate, ut in
 vexillis hunc titulum præferret: *Aut Cæsar, aut nihil.*
 Post vastatam tandem Italiam, obitumq; Alexandri
 Pontificis, Julius II. Pontifex, Cæsarem exutum exer-
 citu, in arce sub custodia tenuit, tandem ex illa dimis-
 sus, ad Joannem Cantabriæ Regem confugit, illiq; in
 bello, contra Alarinum Regulum junctus, ignitâ glan-
 de læsus, occubuit Anno 1507. Cadaver ejus relatum
 Pampelonem, ibiq; sepultum, cujus Sarcophago, ap-
 pensa sunt plura Carmina, ex quibus sunt etiâ hæc:

Aut nihil, aut Cæsar, vult dici Borgia, quidni?

Cùm simul & Cæsar, possit & esse nihil.

Seu:

Omnia vincebas, sperabas omnia Cæsar,

Omnia deficiunt, incipis esse nihil.

Claudo hanc Mutationem, Personâ & Spectaculo
 planè tragico, nempe Friderico II. Romano Imperato-
 re. Hic postquam excusso svavi Ecclesiæ jugo, ad-
 versus Summum Pontificem, Sedisq; Supremæ Autho-
 ritatem consurrexisset, non gladio tantum, verum eti-
 am calamo illam impetiit, ac inprimis hæc Carmina,
 malè sanus Vates protruserat:

Roma diu titubans, longis erroribus acta,

Corruet, & mundi desinet esse caput.

Cui repositum est ab Ecclesia:

Niteris in cassum, Navem subvertere Petri,

Fluctuat, at nunquam mergitur ista Rati.

Cumq; iterum Fridericus impio cæstro percitus, hæc
 Carmina sparsisset:

Fata volunt, Stellæq; docent, Aviumq; volatus,

Quod Fridericus ego, malleus Orbis ero.

D 2

Rescri-

P. Kwiat-
 kiewicz in
 Annal. Ec-
 cles. Annâ
 1239.

Rescriptum est :

Fata volunt, Scriptura docet, peccata loquuntur,

Quod tibi vita brevis, poena perennis erit.

Tandem post immania flagitia, Ecclesiæq; persecutio-
nes, à Summo Pontifice, dignitate Imperii privatus, o-
mni in Subditos jurisdictione ablata, alterius Impera-
toris eligendi jus, ab Ecclesia iis ad quos illa Electio
spectabat commissum, superstes audivit Fridericus, &
inter mille furias, vicinam propè mortem, ultrò acce-
lerabat. Legati Friderici, audito hoc Decreto Ponti-
ficio, recedebant à judicio, percutientes pectora sua,
dumq; omnes Patres Concilii, accensos cereos jam
propè extincturi tenebant, Thadæus Svesanus, unus
ex Legatis Friderici, in illa verba prorupit: *Dies illa,
dies iræ, calamitatis & miseriæ.* Sicq; factum est; ab eo
enim tempore, omnia quasi conjurata mala, supra Fri-
dericum cecidère, ipsumq; cum tota progenie peren-
niter oppressère. Juvat jam Epilogi vice, hisce tragi-
cis mutationibus inscribere :

Tibullus
lib. 3. Eleg. 6

Vos ego nunc moneo, felix quicumq; dolore

Alterius discēs posse carere tuo.

REPRÆSENTATIO PANEGYRICA.

SENATORIS POLONI,

Inter Omina, Decora, & Fata fortunatissima.

In Illustrissimo Palatino Inovladislaviensi.

Collige vires in unum Eloquentia : grande onus
est, quod subis, in uno Lecheo Senatore, non
una Lechias portanda Senatorum. Mille Sparte, in
hac quam suscipis sparta sustinenda. Atlanteis hic
simul

*simul & Herculeis opus lacertis, ubi grandior cælesti,
 Senatorius portandus est Olympus, quot Nominibus
 tot numinibus, quot virtutibus, tot syderibus Illu-
 strissimus. Iustus Lipsius Magnus ille Belgicarum
 Musarum Phæbus, sublimi pennâ, ultra mortalium
 ingenia provectus, animi sui cultum erga Deiparam
 testaturus, ante Aram ejus, in æde Hallensi miraculis
 claram, pennam argenteam suspendit, hosq; inscripsit
 versus; Hanc Diva pennam interpretem mentis
 meæ, per alta spatia quæ volavit ætheris, per
 ima quæ volavit & terræ & maris, &c. hanc
 pennam Tibi, nunc Diva meritò consecravi
 Lipsius. Regna super populosq;, vehebaris hacte-
 nus eruditæ penne obsequio eloquentia, te ipsâ mi-
 nor, quia in plurimas delata partitaq; gentes; ut ex
 omnibus collecta decora, uni Polono inferres Senato-
 ri, Zeuxidis inventum imitata, quot Rerum Publi-
 carum, totidem Dearum formas observâsti, ut unius
 Poloniæ, Senatoriam Curiam, Iunonis veteris simu-
 lacrò, pulchriorem effingeres; & jam Lipsianâ Po-
 litiâ, lassatam erudito volatu pennam, magnorum
 Poloni Senatûs Numinum, ingressa Basilicam, ad
 Senatoriam GALECCIANÆ Curulis Aram ap-
 pende. Appende pennam, GALECCIANÆ Glo-
 riæ portandæ imparem, asvetasq; non humili volatui
 alas, ad cultum ac venerationem magni Palatini se-
 curius submitte, nisi velis Icarie sonitum ruine re-
 dordiri. Magnitudinem Senatoris in Palatino ma-*

ximo metiri desideras? Giganteos tende lacertos, nec prius Senatoris, quàm Senatus Poloni, non prius Senatus Poloni; quàm poli celestis, metire si vales vastitatem, utraq; nempe magnitudo, sub mensuram non cadit, cui sola mensura est, gloriæ immensitas. Senatui ego Polono rectius adscripsero, quod olim de Roma, ejusq; Senatu Cyneas pronunciauit (Vrbs hæc (Senatu scilicet in ea commorante) templum mihi videtur, Senatores Regum confessus,

*Laus
Viri*

Quid verò iste ordo est, nisi flos dignissimus orbis? Pars melior populi humani, mēs publica, portus Consilij, Regni decus, & statio alma salutis, Juris præceptor, Regum confessus, apexq; Justitiæ, mundi lumen, rectiq; corona.

Hæc demum Senatus Poloni est magnitudo, hoc gloriæ fastigium, hic Regnorum apex, in quem nemo provola-verit, nisi prius Avita decora in alas extenderit, propria merita in pennas aptaverit: hoc Tu Senatus Poloni culmen, Palatine Illustrissime occupasti eo felicius, quod non affixas gentilitijs tantum Ceris, excelsi generis pennas, verum nutritas faustis Illustrissimæ Domûs sub Penetralibus, virtutis meritorumq; alas, longo usu rerum, probateq; sapientiæ nervis firmatas, extenderis, fortunæq; inconstantis præcipitia prætervectus, communes fortunatorum non horres vices, quia proprijs, non commodatis fortunæ pennis, in sublime proveheris. Atq; ut Senatoria in Te Omina, Decora, & Fata, semper prospera, GA-

LEC-

LECCEIANA suada representet, omnia ad summæ
 prosperitatis apicem, sublimavit, unica Tue Glorie
 parens, auspex, & arbitra dignitatum, GALECCI-
 ANA Virtus, nulli gravis ac incommoda, ut potè
 quæ, non gentilitium solum decus, verum etiam in-
 genium aviti Iunossæ induisset. Præcant alijs, ma-
 gnis quesitas conatibus ad dignitates omina: incer-
 tos alijs militarium aquilarum volatus, anhelos se-
 quantur intuitu; alijs in cesorum hostium extis, ven-
 tura inspiciantur fata; Tibi certior haruspicina nul-
 la, quam ex calentibus amore patriæ, gentilitij Agni
 visceribus, quæ penitus inspecta, nihil non summum,
 GALECCIANÆ portendunt familiæ. Præverit
 Cranao Græcorum Duci, ad Coronam, auspex Capre-
 arum exercitus, plures ad purpuram non caprarum
 grege, sed unius Amaltheæ, ducuntur à cornu, recte-
 factorum, inopiam, auri supplente copia, Tibi Palati-
 ne Illustrissime ad gloriam, Felicius Gentilitius
 præcurrit Aries, cui nunquam in turpe lucrum erecta,
 nunquam in patriam obversa cornua, innatus can-
 dor, vita in victimam patriæ destinata. Atq; hæc Ti-
 bi magne Palatine omina fuere futuræ dignitatis

--- Mens ardua semper

A puero, tenerisq; etiam fulgebat in annis, Claudianus

Fortunæ majoris honos, erectus & acer,

Nil breve moliri, nullis hæere potentum,

Limnibus; fatisq; loqui jam digna futuris.

Hæc demum in te omina, quæ extra Delphos, tripod-
 esq; Phæbi, Elicia virtus elicit, explicuit disertè
 inter-

interpretis honor, postquam ominatis dignitatibus im-
 plevisset. Tardum plurimorum incrementum, parvos
 magnæ spei fructus vix in exitu autumnali spondet
 virtus, & sæpius in albertem capiteq; hyemantem
 canitiem deijcit, non aliter communi Patriæ Palato
 porrigendos, quam si prægustati jam, ac premorfi par-
 carum faucibus suscipiantur; at Tu Inclite Palati-
 ne, primo ætatis vere, jam tum maturum gloriæ ex-
 hibueras Autumnum, cum vix dum vernare videreris,
 ideoq; plurimorum, vix capularem etatē sequens, Te
 cum ipsis Lucinæ Facibus quæsit honor, ut matu-
 riùs collatus, Titulos Titulis, Fascesq; secundis Fa-
 scibus, toties commendaret, quoties tu merita meritis
 cumulâsses: nec ignarus, quanta patriæ inesset Se-
 natoriarum virtutum orexis, Archimagirum regni
 te statuit, ratus, à nullo, lectiora patriæ, proponi
 posse obsonia, quàm à Te, qui non quæsitæ ultra
 extrema maria, non extortas cum sanguine, lacry-
 marumq; salsedine insulsas dapes, verum de Tuo,
 Tuas, dominatas, in gentilitio Agno, innumeris
 virtutibus plenissimo, mensas erigeres, secundis secun-
 diore, imò secundissimas. Accidit palato, Iovis
 Poloni, victima publicæ felicitatis GALECCIA-
 NVS AGNVS, hinc Phryxæo Ariete digniorem,
 in cælum Poloni Senatus transtulit, vellus in Pala-
 tinam Purpuram elaboravit, Mars & Bellona amica
 GALECCIANÆ Domui Numina, Tyrj vice
 muricis, Tauricano tinxerunt cruore. Ac nè excel-
 sum

Primò Ar-
 chimag, Re-
 gni creatur.

sum Agni GALECCIANI *sydus*, in pari tropico 33.
 coruscaret, in Majoris Poloniæ climate illud consti- tum Castell-
 tuit, clariùs è sublimiori convexo, universam patri- lanus Calis-
 am illustraturum. Nunquàm Calissiensis, nunquàm se sienfis.
 majorem, Polona in majori Polonia vidit libertas,
 quàm sub dominio Agni: verùm parum erat Polo-
 niæ ad Gloriam, exile virtuti Tuae ad Majesta-
 tem, Calissensem, Te Castellano impleri curulem,
 nisi etiam impleres Posnaniensem: Hinc cælestis in- Deinde Po-
 star Planetarum Principis, Castellanus Hyperion, snaniensis.
 uno lustrato & illustrato cælo, alteri oriebaris, nè ut
 suo, ita Tuo nomine major diceretur Polonia: Imò
 majori Polonia majorem virtutem Tuam, vidit pro-
 bavitq; coronatus Poloniæ Iupiter, cum Te, post
 illustratos geminos Castellanos Polos, ad tertium cæ-
 lum usq; sublimasset; nempe, ut sicut in illo cælesti, tandem Pa-
 ita in terrestri Palatinatûs Inowladislaviensis cælo, latinus Ino-
 Lucerna esset Agnus. Proprium planè, nec ullum wladislavi-
 magis conveniens *sydus*, pacis Regioni, Agno, eo ensis.
 gratius exortum, quod cùm quiete lucem apportaret.
 Odit enim verò GALECCIANVS Iuno sa, non
 solum Purpuratos Centauros, Leonesq; illos, ad quo-
 rum exortum Pacifica etiam Climata, in fulminum
 vertuntur Regionem, verùm etiam caliginosa illa,
 Aquatorum *sydera*, quæ omnibus, Fulminibus per-
 nitiosiori illuvione, subjectum depravant orbem.
 Procul hæc erronea caliginosaq; lumina, ab Illustris-
 simo GALECCIANO Agno, quem in Palatino
 E
 celo,

celo, inter Senatoria decora, totidemq; radios obser-
vaturus, quantumvis criticos Livor admoveat ocu-
los, nihil observabit, nisi quod suam, agram scilicet,
quia lividam, ledat pupillam, saniora Patriæ pascat
lumina, & delectet. Proprium syderibus in infe-
riora climata influxum, vidit non minus liberalem,
quàm salutarem Polonia, adorant aureum syds, fe-
licitatis aureæ auspex, miserorum ædes, & Religio-
sorū Asceteria, illudq; GALECCIANIS inscribunt
postibus, quod suo Principi Floridus inscripsit vates,

*Munificen-
tia in Reli-
giosos & pau-
peres.*

*Claud. de
laud. Probi-
ni & Olibrii*

Hic, non divitias nigrantibus abdedit antris,
Nec tenebris damnavit opes, sed largior imbre,
Sveverat, innumeras opibus ditare catervas.
Cernere semper erat; populis undare penates,
Assiduos intrare inopes; remeare beatos.

*Krotosyni
everso Lu-
theri fano,
erigit Eccle-
siam Princi-
pibus Apo-
stolorum.*

Krotosynensis Principibus Apostolorum, erecta, su-
per conculcato contritoq; Lutheri capite Ecclesia,
stabit GALECCIANÆ gloriæ capitolium Romano
perennius, stratiq; cum diruto fano hæreseon Pha-
natici, jacentes sub pedibus Apostolorum, assurgent
zeli GALECCIANI monumenta ære perenniora.
nunquam scilicet, sublimiora censet orthodoxa religio
trophæa, quam ejusmodi ruinas recensendo. Conjun-
xisti Palatine Illustrissime, erga Deum Divosq; celi-
tes, Majestatiq; Senatoriæ, amorem omnium, solen-
nem illam secundæ fortune comitem, superbiam scili-
cet detestatus, hoc magis excellens & eminens, quod
unus ex omnibus inter omnes censearis. Sapientiæ
Eloquentiæq; Tuae Polone Nestor, illud inscripsero
quod

quod suo Purpurato Phrygius inscripsit vates.

35

Nestora magnificat morum prudentia custos
Consilij, librata fides, & sobria fandi
Gloria.

*Dares Phry-
gius.*

*Tibi magne Palatine, Senatus Polonus, Respubli-
ca, Nobilitas universa, illud meritò inscribit, quod
olim Polonus Ecclesiastes Stephano Regi, Marti illi
Europæo, inscripserat,*

In sententia ferenda, plus quàm Senator:
In judicijs, plus quàm Juris consultus;
In Ecclesia, plus quàm Sacerdos;
In exercitu, plus quàm Imperator;
In tota vita sua, plus quàm Philosophus.

*Starovol-
scine.*

*Adversis in Te Fatis, inconstantig fortune nihil
licet, qui supra fortunam virtutibus proveberis,
his cum debeas omnia, nihil illi cæco numini debê-
re, liquidò ostendisti, postquam illam faciendo Tibi
oberatam, Tue fortune Faber, Tuam eandem ef-
fecisses. Vive Palatine Illustrissime, & inter no-
va omina, Decora, Fataq; Domui Tue fortuna-
tissima, post coronatam supremis honoribus Domum
Tuam Illustrissimam,*

Serus in astra redi, formidandasq; superbis
Temne Deas, æterna trahent Tibi stamina fata,
Cæca Tuos vultus si mors spectaret amaret.

MAGNITUDO SECUNDA
TRISMEGISTI POLONI
LEGATVS.

*Inter propria Omina, Decora,
Fata.*

OMINA LEGATI.

OMEN PHILOSOPHICVM.

INtimus ac cognatus substantiæ Legatus Accidens, tantâ pollet activitate, ut illo agente, substantia perenni pace perfruatur: nihilominus & pacis & belli gloria, ex Accidente in Substantiam, ceu militum plausus, in Principem promanant. Hujus verò activitatis in Accidente, omen erat virtus illa agendi, quam naturali jure, accidens ita hereditavit, ut meritò virtus substantiæ nominaretur. Secundò, Martia illa Fidelitas, ita substantiæ foederata, ut perennem hostilitatem exerceat, nullaq; foedera cum illis admittat, quibus aliqua in exitium substantiæ assurgendi, subsint indicia. De hac accidentis activitate, ominatus est olim Philosophus, Libro de sensu & sensibili: *Quà igitur ignis, & quâ terra, nihil natum est agere, quâ autem inest contrarietas in eis, hæc omnia agunt, & patiuntur.* Hinc solennis activitatis Physicæ, exoritur tessera: *Accidentia sola immediate, tanquam virtus adæquata causæ create, producant substantiam.*

OMEN

O Men Politicum, Legati Orthodoxi, non est illud, quod Politici quidam malè assignant; nempe *matèriam statûs*, cui ita se devoverunt, ut nihil sit tam sanctum, quod in Idoli istius cultum, non judicent esse profanandum. Hinc jam percrebuit definitio Legati publici, apud quasdam gentes, *quòd sit vir bonus, id est, boni & sinceri hominis speciem præseferens, foràs missus ad mentiendum*. Quis orthodoxus Legatus istud encomium ferat, & non potius velis remisq; aversetur, ac cum suo Machiavello omnibus diris devoveat? Legatus ergo est *ille vir bonus, qui Reipublicæ nomine, ad Principes delegatur Orator*. Omen Legati, est explorata in Patriam fidelitas, nullis amica, nisi Patriæ amicis: hostibus hostis: licet enim augurari, acturum illum pro Patria, cum externis fideliter ac proficue Patriæ, qui cum concivibus, non suam rem egit: non vincetur affectu externo ille, qui amoris proprio nunquam succubuit. Neq; solum Patriæ, verum etiam hosti servanda fides: hinc Legati illi perfidi, indigni sunt hoc munere, quibus solenne est: *Pacem orare manu, præfigere puppibus arma*: quorum ingeniosa Pòësis ideam, in perfido illo Deorum Legato, Mercurio expressit. Odio non divino, nec humano prosequeretur centoculum Argum Jupiter, delegat igitur Mercurium ad eum interficiendum, hunc decepturus Mercurius, talaria pedibus, capite galerum induit, manum impedit virgà, pastoremq; habitu simulans, ante se capellas agens in rura, carmen agreste modulatur. Argus captus dulcedine cantûs, incognitum Deum invitat, ad secum in umbra confidendum, Mercurius quâ fabulando, quâ canendo, protraxerat diem, & paulatim in somnum Argum reclinavit; sed quia, luminibus quibusdam clausis, vigilabant alia, non potuit totum consopire ho-

*P. Groben-
doq. de or-
tu & pro-
gressu spiri-
tus Politici
lib. 1. c. 1.*

minem, donec medicatâ virgâ, permulsit oculos, eos-
 què lenissimo contactu penitus occlusit, tandem sensi-
 bus jam omnibus destituto, caput ense demessuit.
 Mercurius, Legati vafri & perfidi idea est: Serviebant
 ei, plures ad fallendum Argum technæ. Primò, ut
 simulationem & dolum tegeret, simplicitatem Pastoris
 induit, & similitudine habitûs & fortunæ, sese in ami-
 citiam hominis insinuavit. Deinde adhibuit insidio-
 sam facundiam, huic adjunxit illecebroso modulos,
 virgam præterea soporiferam. Hunc imitantur Lega-
 ti, qui Svadam in ore, fallaciam in pectore portant,
 quorum insigne caduceus est, pacis quidem, & amici-
 tiæ Symbolum, sed idem, dolosa simul est Mercurii
 virga, serpentibus circumvoluta. Hæc illi instructi,
 etiam vigilantissimos oculos fascinant, & tenebris ob-
 ducunt. Dolosi hi, ac mali ominis pessimi Angeli
 sunt, sinistri ominis tibi alites futuri, nisi è numero sis
 pennatorum, oculosq; in ejusmodi fallacias semper a-
 pertos tenueris. Hos quia centoculus non habuit Ar-
 gus, rectè ipsi inscripsit Pòëta:

Virgil.
Æneid. 2.

*Arge jaces; quiq; in tot lumina lumen habebas,
 Extinctum est; centumq; oculos nox occupat una.*

OMEN HISTORICVM.

SÆpiùs belli quàm pacis auspices, Legatos vidit Or-
 bis, nec toties amica pacis Sidera, quoties præfagos
 bellorum Cometes, imò tempestatum illarum, quibus
 integra concussa & convulsa sunt imperia, prodromos
 à variis-Polis exortos exhorruit.

Ante bellum Carthaginense, ad Senatum Cartha-
 ginensium inter alios Legatos missus est Q. Fabius, qui
 postquam in Senatu illo stetisset, sinu ex Toga facto,
hæc, inquit, vobis bellum & pacem portamus, utrum placet,
sumite. Sub hanc vocem non minùs ferociter Cartha-
 ginen

Livius lib-
 21.

ginenses, daret, utrum vellet, succlamaverunt; tūc Fabius iterum sinu effuso, bellum se dare dixit: accipere se responderunt Carthaginenses, & quibus acciperent animis, iisdem se gesturos.

Cū Darius in Scythia, in angustias cum exercitu incidisset, miserunt ad eum Scythæ Legatum, cum *Ave, Mure, Rana, & quinque Sagittis*. Ea munera Gobrias id indicare dixit, nisi Persæ vel cum avibus in ærem evolarent, vel cum muribus intra terras se absconderent, vel cum ranis in paludes se demergerent, non evasuros telorum Scythicorum ictum.

Herodotus
lib. 4.

Boleslaus Kriwoustus, Bialogrodum in Pomerania oppugnaturus, duo Scuta cum Legato misit, *album, quo pax, & rubrum, quo excidium significabatur*: illi Scuto utroque accepto, sanguine Polonorum, se sibi candidam victoriam paraturos, responderunt. Sed expugnati, misericordiā Victoris vitam retinuerunt.

Cromerus
lib. 5.

Caidanus, Ultra Volgensium Scytharum Regulus, audito per Russiam Erdivili Principatu, per Legatos tributum imperat, vel bellum. Erdivilus Legatos humanissimè detinet, interea Militem congregat, tum Legatis imperiosè vocatis, tributum negat, bellum indicit, & Regulo, donorum loco, *Sagittas duas* perferendas tradit; ipse occultis per sylvas itineribus, hostem invadit, & cædit.

P. Koiatowicz
Hist. Lith. Part.
1. lib. 3.

Anno 1332. Dux Moschoviæ Demetrius Semeczka, totius Russiæ potiundæ cupidus, ad Olgerdum Magnum Lithvaniæ Ducem, Vitebsci tum degentem, Legatum cum igne & gladio misit, hæc (ajens) munera, à Suo Duce, Vilnæ inter Paschales ferias expectaret, nisi Russiâ cederet, Lithvaniam Moschoviæ Duci subiceret, tributum servitutis pretium mox numeraret. Olgerdus, acceptâ legatione, Legatum humaniter detinet, collectum è Samogitia, Lithvania, Russia exercitum, mediâ Quadragesimâ in Moschoviam ducit; præibant exercitum, agresti-

grestium operarum millia aliquot; his imperatum, ut viam, quæ rectè Moschuam tenderet, per sylvas atque paludes aperirent. Ubi Mosaiscum ampla civitas non procul esset, Olgerdus exercitum in apertam viam educit, Legatum hætenus ignarum, quid secum ageretur, advocat, *fomitem succensum* tradit dicens: perferret Suo Principi literarum, munerumq; loco fomitem accensum, diceret, *liberare se Ducem Moschoviæ, labore Vilnam usq; pergendi, & priorem Moschusæ adfuturum, quàm ignis fomitem hunc exederet.* Octo adhuc supra decem millia supererant, inter castra Lithvanorum & Moschuam, tantâ tamen celeritate id viæ confectum est, ut Legatus, sequentem exercitum, vix paucis horis antecesserit. Hâc ipsâ nocte Legatus Moschuam ingressus, quâ Christo post mortem surgenti Sacra, Dux ad nocturna Sacra templum ingrediebatur; Legatus occurrit, hostem se Mosaysci reliquisse nuntiat: Fit ingens trepidatio, obsidetur interim à Lithvanis Moscuam, suburbia incenduntur, agitur de pace, certisq; conditionibus concluditur, Lithvanis ingens pecunia, stipendii vice, à Duce Moschoviæ numeratur: tum Olgerdus, cum selecto Equitatu, Moscuam ingressus, ipse hastam ad portam Arcis Ducalis frangit, tum Ecclesiam, ubi Dux Sacris intererat, intrans, hoc stylo Moschoviæ Ducem salutat: *Intelligis jam Demetri, quis nostram gerendis bellis maturius consurgat, simulq; Ovum Paschale Duci obtulit.*

P. Koiaſto-
wicz Hiſt.
Litv. Par.
1. lib. 8.

Anno 1410. supremum contra Crucigeros, à Jagellone & Vitoldo bellum suscipitur, & ad Grinvaldiam sedes belli eligitur: Jagello Rex pientissimus, non ignarus, ut bella ipsa; ita victorias solius nutu Numinis dispensari, ante Sacras Aras, cum interea incruento sacrificio litaretur, in genua provolutus, imminentis prælii fata, Supremo rerum omnium Arbitro commendabat. Magister Crucigerorum Ulricus de Jungingen victo-

victoriæ securus, atq; indè moræ impatiens plenâ fastu legatione, Regem ac Vitoldum in prælium provocat. *Duos enses strictos*, unum dexterâ, alterum sinistrâ ferebat Legatus. Hic, ubi surgenti ab orando Regi obviam occurrit, Magistri sui nomine, moram, metumq; exprobrat; *Si arma ad prælium deessent, unum Regi, alterum Vitoldo gladium, à Magistro offert.* Imperturbato adhæc Rex animo, vultuq; *Benè est*, inquit, *accipio lûbens Omen, hostis in jugulum suum, ferrum ministrantis.* Mox dimisso Legato, DEI, & Deiparæ Virginis auxilium invocatur, signumq; pugnæ cani jubet. Pugnatur, vincuntur, cædunturq; Crucigeri, quadraginta bellatorum millia ex illis cæsa, cum ipso Ordinis Magistro Ulrico.

Russi aliquoties à Boleslao cæsi, ut vindicarent clades sibi illatas, dolo usi sunt ejusmodi: Missis Legatis obstringebant se, omnes Tributarios fore. Rex igitur nihil mali suspicans, paucis Copiis stipatus Russiam petit, ubi ad Haliciam à Russis & Ungaris cingitur: in primo congressu Palatinus Cracoviensis, cum præcipua ala Equitum terrore actus fugit, Regemq; deserit. Rex vix fugâ se præsentì cladi eripit, Palatiniq; Cracoviensis perfidiam execrans, *pellem ei leporinam, & Colum muliebri instrumentum, & lini fasciculum, funemq; misit*: indicans, eum in fugiendo similem fuisse lepori, nec dignû, qui sit vir, sed potius mulier habeatur, dignusq; suspendi. Palatinus ille in desperationem actus, in Campanili Oratorii sui, fune campanæ se suspendit, ab hocq; tempore Castelianus Cracoviensis, Palatinum dignitate antecellit.

P. Koiałowicz Hist. Lith. Part. 2. lib. 2.

F. DE-

DECORA LEGATI.

DECUS PHILOSOPHICVM.

Rationalis Philosophia, ut suæ scientiæ Majestatem demonstret, Demonstrationem, tanquam perfectissimum persuadendi modum, in objectum Attributionis eligit. Legatio Demonstratio est Majestatis Regiæ, sicut ergo Philosophica Demonstratio non omni argumento innititur; ita Politica non nisi lectissimo subjecto conferenda, in quod omnia civilia attributa referantur: id vel ipsa Legati notatio, Varrone auctore demonstrat, qui *Legatum à legendo dictum esse docet*, quod non nisi lectos, hoc est, ut Maro canit, *delectos ordine ab omni*, tam arduo muneri præficiat.

DECUS POLITICVM.

DECUS PRIMUM Legati, est DECOR CORPORIS, virilis, & qui virum suum loquitur. Hinc in Legato, spectanda est corporis & membrorum, ad omnem gravitatem composita symetria. Risus olim obortus est in Sacro Cardinalium Conventu, cum Jacobus de Castello, Bononiensis, ad Bonifacium Pontificem Maximum Legatus peroraret: Hic cum pusillâ staturâ esset, Pontifex ratus, Legatum genibus flexis verba facere, erigi & assurgere eum jussit. Consultius ejusmodi hominibus esset sedere, quàm stare, secundum illud Nasonis consilium: *Si brevis es, sedeas, ne stans videâre sedere*, Nec etiam Legati mittendi, qui nimis & Cyclopici sunt proceritatis, ne colossius magis quàm homo mitti videatur. Nec mittendi, qui insigni aliquo corporis nævo sunt notati: Ita ob nævum in facie accepti vulneris, irrisus est, teste Varsevicio, Hispani-

Hispaniensis Legatus, licet ingeniosè se vindicavit. Nam à quodam Bassa interrogatus, deessentne ipsius Domino homines alii, quos sine cicatricibus ad Imperatorem mittere potuisset? respondit Legatus: *Hominum nobis abundè est; verum idè cum nota hujus vulneris, quod non aversa, sed adversa parte accepi, ad vos venio, ut nostræ de vobis ad Naupactum victoriæ, testimonium ob oculos proponerem, in qua pugna & tu debuisti interfici, nisi pedibus tibi consuluisses.* E Stoicorum censu Catonem fuisse accepimus, qui sola animi bona pro veris habebant, cætera verò decora ne nomine quidem boni digna judicabant: Et tamen eundem, deformitatem, in Legatis suâ ætate à Senatu missis, scommate & joco profecutum legimus. Cum enim pacis ergo, inter Nicomedem & Prusiam faciendæ missi essent, quorum alter lapide quondam petitus, cicatricosam frontem ferret, alter verò è pedibus laboraret, tertius verò, ingenio planè socorde esset; festivè ille, *Legationem*, inquit, *populus Romanus mittit, quæ neq; caput, neq; pedes, neq; cor habet.*

DECUS SECUNDUM, EXPERIENTIA RERUM. Hanc rarò in prima adolescentia reperias. quare ad hæc similiaqvè, fenes deligendi, quos longus rerum usus, fortuitiq; ac destinati casus erudierunt. Non tamen etiam Juvenes omnes excludendi à Legationibus, judicii hoc in munere, altitudo, non ætatis consideranda. Audiantur inter suffragantes Legato voces, etiam juvenum pro se suffragia:

*Mento canescant alij, nos mente; capillo,
Nos animo; facie, nos pectore. Tempora certè
Virtutem non prima negant, non ultima donant.
Quùmq; duplex ætas varios contendat in usus:
Hæc viget, illa jacet: hæc pullulat, illa fatiscit.*

DECUS TERTIUM Legati, ELOQUENTIA.

Legati illa Generosi vox fuit: *Si bella vocabant, miles eram; si pax, positis toga gestijt armis.* Eloquentia interim

Dares Phrygius de bello Troian. l. 1.

fit matūra & brevis; non placet enim Principibus prolixitas, & ferè in uno pectore, prudentia & multiloquentia non conveniunt; undè nisi succinctus sit Legatus, idem audire cogetur, quod de Samiorum Legatis, Cleomenes Lacedæmonicus dictum reliquit, cum nimis prolixa oratione uterentur, nempe responsum acceperunt, quòd quæ primo loco dixissent, non recordaretur; media, non intelligeret; idèòq; ultima approbare non possèt. Brevitas sermonis in Catone Legato adèò placuit Græcis, ut Romanorum sermones in pectore, aliorum in ore nasci pronunciarent.

DECUS QUARTUM Legati, TEMPERANTIA & CONTINENTIA. Turpe à vino, turpius à Venere vinci, reddunt delirum scæmina, vina virum. Malus custos consilii vinum, pessima secretorum servatrix mulier.

DECUS HISTORICVM.

R Eliqua Legati Decora clariùs pateant in exemplis. Exemplum magnanimitatis insigne; habetur in Prisco Rhetore de Apollonio Orientis Legato. Attila offensus, quòd sibi tributum à Theodosio & ejus subditis non solveretur, Legatum ad se non admittit, munera tamen, quæ ei ab Imperatore Apollonius attulerat, sibi tradi postulabat, nì traderet, mortem illaturum se minabatur. Apollonius respondit: *Non decere Scythas in aliqua dubitatione versari, utrum dona an exuvias accipiant, cum ea res in illorum esset arbitrio.* Indicavit hoc dicto Legatus, dona quidem à volentibus accepturos, si se tanquam Legatum admitterent; sin minùs, quæ eriperet, spolia potiùs quàm munera censerì debere: terruitq; inopinato responso, & intentatæ mortis contemptu barbarum hostem, tam facilem alioqui in sanguinem, quàm in prædam.

Fide-

Fidelitatis exemplum patuit in Pompejo: hic dum Legationis munere fungeretur, à Gentio Rege interceptus, cum Senatûs consilia prodere juberetur, ardenti lucernæ admotum digitum cremandum præbuit, eâq; patientiâ, Regi simul & desperationem tormentis quidquam ex se cognoscendi incussit, & expetendæ Populi Romani amicitie, magnam cupiditatem ingeneravit.

Sapientie exemplum, præbuere olim Duo Saxonie Electoralis Legati, Abrahamus Bokcius & Andreas Pauli, quorum auditâ Oratione Stephanus Poloniæ Rex, subjunxit: *Non dubitare se, non unius regni & imperij, sed totius terrarum orbis gubernacula, duorum horum Nestorum fide & consilio adjutum, felicissimè gubernaturum.* Idem judicium erat Urbani VIII., de OSSOLINIO Legato Vladislai IV. Poloniæ Regis, cujus admirabili svadâ, Summus ille Pontifex delectatus, subjunxit: *Non potuisse Ciceronem cum majori populi Romani plausu pro rostris perorare: OSSOLINIUMqve UNICI FILII* *Vasenbergius.* *NOMINE* insignivit.

FATA LEGATORUM.

FATVM PHILOSOPHICVM.

P Ræscindendo à Decreto Divino, quo *statutum est omnibus hominibus semel mori*, probabile est, quòd possit Legatus naturaliter perpetuò vivere, modò ipsi adesset copia, talium Medicorum, quibus inesset notitia rerum naturalium, quæ in hoc universo sunt conditæ.

VT aliorum mortalium, sic & Legatorum mortalis vita, mille fatis impetitur, ut benè expressit Herodianus lib. 2. in vita Pertinacis, his verbis:

Hic laqueo, hic ferro, hic flammis, hic frigore, hic undis,

Ille fame, ille cibo moritur: multiq; dolore,

Aut morbo, aut casu intereunt, seniore fatiscunt.

Certa dies lethi est cunctis, discrimina nulla

Ætatis: nec fas vivendo excedere metas,

Præscripsit tetrici quas cuiq; potentia fusi.

Heu quot habet mors sæva vias, artesq; nocendi!

Non inficior equidem, teste Cicerone, nomen Legati ejusmodi esse debere, quod non modò inter sociorum jura, sed etiam inter tela hostium incolume versetur: læsos tamen Legatos sacrosancto gentium jure calcato, non semel accepimus. Sed nullus inultus diù sanguis stetit. Asculani Romani populi Legatos occidunt. Verùm arsit hæc cæde Italia tota, expugnato tandem à Pompejo, arcis præsidio, Præfecti, Centuriones, civitatis Principes, virgis cæsi, securi percussi sunt, & ita sanguine, sanguini Legatorum parentatum. Ligures Flaminium Legatum opibus exuunt & vulnerant. Hinc Ægina, in qua violatus Legatus, obsessa, capta, in servitutem cives dati, authoresq; injuriarum catenis onusti, Romanam abducti. Lartès Tolumnius Vejorum Rex, quo authore à Fidenatibus, Romanorum Legati cæsi, bello cadit: Fidenates verò cum Rege suo deleti, urbs capta, direpta, cives superstites sub corona venditi. Fuit nimirum hoc omnium gentium jure receptum, ut sanctissimè Legatorum integritatem tuerentur, non opibus, non sanguini parcerent, Provincias & Regna funditus delerent.

M Andatorum sui Principalis, & veteris consuetudinis, memor debet esse Legatus. Hinc Orobasium Parthorum Legatum, quod Syllæ nobiliorem in confessu sellam concessisset, sui cives necârunt. Et Demagoras multatus Athenis, quod Persarum Regi proprium Athenientibus cultum exhibuisset. Demades etiam punitus, qui similes honores Alexandro præstiterat.

Fastus etiam in Legatis non transit impunè. Ita Lacedæmonii Legatos Xerxis, in barathrum & puteos præcipitârunt, quod magnificis & injuriosis aliquomodo verbis, ac superbâ nimis Oratione, terram & aquam petiissent. Balaklajus, Ultravolgensium Scytharum Regulus, bellum contra Skirmundum Novogrodiæ Ducem molitus, ut causam prætenderet, pro tributo mittit. Offensus superbâ Legatione Skirmundus, contracto ex Lithuania Russiaqve exercitu, exceptis lautissimo convivio Scytharum Legatis, post longam commestationem, *nares & aurículas singulis abscindi jubet*, illasq; tributi loco Regulo referri mandat. Tartarus tantâ contumeliâ incitatus, Koydanoviam usque populationibus attigerat: verum præstò aderat cum exercitu Skirmundus, pugnatur, vincitur, & occiditur Regulus. Skirmundus victoriam urgens, Mozyrum, Starodubum, Czernichoviam, totamq; Severiam Tartaris recepit, ac Novogrodiensium Ducatui adjungit.

*P. Koiaſo-
wicz Hiſt.
Litvæn.
Parte 1.
lib. 3.*

RE-

REPRÆSENTATIO PANEGYRICA.

*Inter Omina, Decora, & Fata
fortunatissima.*

IN ITLVSTRISSIMO PALATINO
INOVLADISLAVIENSI.

HActenus aliorum non minus Legatorum specta-
trix, quàm Legationum comes, per varia Re-
gna gentesq; ferebatur, ad Te tandem ceu suum ad
centrum regreditur Eloquentia, in quem omnia,
Omina, Decora, Fataq; fortunatissima Legatorum
confluunt ac concentrantur. Illustrissime Domine.
Magnarum verò, quas pro Rege & Patria subijsisti,
Legationum Sarmaticus Cyneas, amen erat, etiam-
num in pretexta Virtus Tua grandeva, quæ illos
privati solis sacrificulos Heliogabalos, illos ridicu-
los non ultra paret impar domesticum ad focum Con-
sules exosa, generose more aquilæ, non diu à ma-
terna pendebat rostro, jam tum è nido ad solem
evolavit, cùm alijs vix repere sit solenne. Publicis
Tuis ad Principes Europæ expeditionibus, prævivere
frequentes intra Patriam ad Generalia Regni Comi-
tia Legationes, minores quasi victime, maxime he-
catombe. Nempè futurus olim Majestatis Polone,
coram Regibus & Principibus bajulus, intra pa-
triam Tuas explorabas vires, talemq; Te Domi-
lut

Ad Genera-
lia Regni
Comitia se-
pius Legatus

lut ultra cortinam componebas, qualem in publico
orbis theatro, Regum ac Regnorum oculis propone-
res. Quis solennes illos Commissionum actus, cum
pace partium, à Te compositos, pari celebret elogio?
unum magnus non semel Commissarius commisisti:
quod nihil omiseris, quo jus æquumq̃, quo statera
justitiæ offenderetur. Hinc Te felicem reum, Regalis
judicij honor comprehensum, Supremo Regni Tri-
bunali exposuit, ut in hoc æquiori extra Græciam A-
reopago, non minus in aliorum vitia, quàm in Tuas
virtutes promeritam ferres sententiam. Tu interim,
non aliter de Te, quàm humiliter judicans, in nul-
lum magis, quàm in Te censorius Cato, nihil de Te,
nisi humile in Tuo Tribunali statuebas, nec Gratijs
cum Xenocrate, nec ulli Numini, præterquam soli
Astræe gnarus sacrificare. Sic de Te rigidus iudex,
omnium Tibi favores adjudicasti, tulistiq̃ in Te
sententiam, quam ferre recusabas; nempe ex illa
virtutis Æde unanimi Tuorum Collegarum sancito,
Tibi ad Templum Honoris Senatorij transitum decer-
nente. Placuit istud Regalis Areopagi placitum IO-
ANNI III. AVGVSTOq̃ semper SECVNDO,
Poloniarum Regibus. Hinc ut illud Regijs Gra-
tius coronarent, coronariam meritorum Tuorum
purpuram emeritis imposuerunt lacertis. Verùm pa-
rum erat, tot meritorum purpuratum, unius Poloniæ
oculis exhiberi. Ivisi ergo bonis Avibus, quia
Sarmaticis aquilis, Augustus MAGNI AVGV-
STI

*STI Fecialis, per diffita regna. Polonæ ostentator
& stator Majestatis, vidēre stupuēreque in Magno
GALECCIO, veteres Cyneas, Fabioſque Maxi-
mos, florentiſſima Daniæ, Sveciæque regna, ſtatūſque
Hollandiæ, in radiūque Illuſtriſſimo, Serenitatem Po-
lonam adorârunt. Neque radij nomen aut humilius
aut vilius portati à Te muneris dignitate arbitreris:*

Anno 1700.

Legatus in

Sveciam,

Daniâ, Hol-

landiâ &c.

à Serenis-

ſimo AVGV-

STO II.

*nihil ſecretius eſt radijs ſolis, vident omnia, & vix
videntur, apparent & latent: nihil ijsdem ſubtilius,
pervadunt ſoliditatem cælorum, nec franguntur:
permeant ignem, nec exuruntur: percellunt aërem,
nec leduntur: Denique nihil eſt ijsdem radijs fide-
lius. eunt ad imperium, redeunt ad nutum. Talem
oportet eſſe Legatum Regum, Talis fuiſti Palati-
ne Illuſtriſſime. Oſtendiſti palam, Te purpureum
ſolis Poloni radium, ſecretum ut tegeres, ſubtilem
ut explorares aliena, eloquentem ut perſuaderes,
efficacem ut ageres, fidelem, nè velles fallere, ſapi-
entem nè falli poſſes. Rediſti in patriam plauſi-
bus externorum Regum comitatus, acceſſiſti Polo-
nam Majestatem, nec minus Regiam, quàm cor Re-
gium in Tuo regreſſu es ingreſſus. Vibe Magne
Magni Regis, mentiſque Auguſte Arbitrator, adverſa
Tibi fata nè metue, rigeſcent omnia ad aſpectum
virtutis Tue, veriùs quàm ad ſcutum Palladis.
Quodſi facta ſecutus fuerit quavis ingentia livor*

*Dares Phry-
gius de bello
Troi. l. 6.*

*Diſce libens, livore nihil ſublimius eſſe;
Sis utinam invidiâ dignus, quæ ſumma laceſſit.*

MA-

MAGNITUDO TERTIA
TRISMEGISTI POLONI.
MILES.

51

*Inter propria Omina, Decora,
Fata.*

OMINA MILITIS.

OMEN PHILOSOPHICVM.

Philosophus, inter plurima signa prognostica, habet
signum unicum, ex quo de insigni cujuscumque ad rem
bellicam indolē certò ominari potest. Atq; hoc signum
est naturale, quod in ratione signi constituitur formaliter per
naturalem connexionem cum eo, in cujus ducit cognitionem.
Ita juxta Scripturam Prov. 6. ex studijs suis cognoscitur
puer, arbor è surculo, seges ex herba.

OMEN POLITICVM.

Omina Politica Militis ex variis signis colligi pos-
sunt.

SIGNUM PRIMUM est Educatio dura & aspe-
ra: quia ut *mollibus assuetus, loricae ferre recusat*, ita vul-
nera & mortem minùs timet ille, qui minùs deliciarum
novit, ait Vegetius. Quare optimè ex eo capite lau-
dat Pòeta Scythas: *Excipit hic natos glacies, & matris ab
alvo; artus infantis molles, nix civica durat.* Hinc illa Scy-
tharum fortitudo planè admirabilis. Dario olim toti-
us Regni viribus impetum faciente, Scythæ paulatim
cedentes, ad ultimas solitudines pervenerunt: inter-

rogati verò ab eo, quem fugiendi finem essent facturi? responderunt: se nec agros, nec villas, nec urbes habere, pro quibus dimicarent, & ided cederent: ceterum cum ad parentum suorum monumenta perventum esset, tum demum sciturum Darium, quomodo Scythæ soleant præliari. Lacedæmonii, populorum omnium bellicosissimi, ex Lycurgi legibus, pueros in scutis pro cunis alebant, virosq; in scutis pro Sandapilis extulisse scribuntur.

*Cromerus
lib. 5.*

Idem l. 10.

Boleslaus Krivousti, nonum agens annum, impetravit magnis precibus & lacrymis à parente Vladislao, ut cum Sieciecho Campi Duce, adversus Prussos proficisceretur; ivit, multaq; supra ætatem & fecit, & tulit. Premyslius Posnanienfium Dux, iussus à Patruo, exercitum duxit contra Marchionem Brandeburgensem annos natus 16. feliciterq; pugnavit. Sic parvi ad maxima bella aptabantur Annibales, sudabantq; inter bellicos ætus ante pilos, *quorum sub galeis tandem Marvortia canuit ætas.*

SECUNDUM SIGNUM futuri Militis est innata, & à Majoribus contra hostes Ecclesiæ & Patriæ cum lacte instillata proli inimicitia. Ita olim Angli, à pueritia odio Gallorum imbuebantur. Cum enim Angli sagittandi arte excellerent, pro scopo, in quem sagittæ defigerentur, ponebant Statvam veste Gallicâ ornatam, ac filios suos artem sagittandi docebant, hac compellatione: *Disce ferire Francum.* Vetustissima est, ac gentilitia quædam antipatia Gallorum cum Hispanis. Memorabile est Hathvei Cacici odium in Hispanos. Hic ob quædam flagitia captus, & ad rogum damnatus, jamq; palo affixus, & à Sacerdote monitus, futurum si crederet, ut mox æternæ beatitudinis præmiis, sin minus, æternæ damnationis suppliciis afficiatur: postquam cogitabundus hæssisset aliquamdiu, tum ex Sacerdote sciscitatur: an etiam Hispanis regnum cœlorum pate-

pateret? affirmante Sacerdote, bonis patere; sine longa deliberatione respondit: *Cælum se nolle potere, sed potius inferos, ne sibi domicilium cum gente Hispana commune esset.*

53

TERTIUM SIGNUM est Militis Exercitatio bellica. Undè Vegetio teste, populus Romanus Orbem sibi subegit, nisi armorum exercitio, disciplinâ castrorum, & ulu militiæ? Apud Romanos enim, integrâ die feryebant militaria exercitia: veterani exercebantur semel, juniores bis, imò & ipsi Duces.

OMEN HISTORICVM.

Multum interest, quibus signis, ominibus, portentis primordia vitæ vel illustrentur, vel infamētur.

Georgii Castrioti, vulgò Scanderbegi, Herois fortissimi secutura facinora, Matri serpens per quietem objectus indicavit, qui totam Epirum operire, & caput in Turciam protendere visus est, quòd Epirum Græciæ finitimam regionem Principatum hæreditarium Turcis erepturus, & longè latèq; terrorem ac damna circumlaturus esset. Acinacis præterea, brachio impressam effigiem ab utero tulit materno, futuri bellatoris ostentum. Barlecius in ejus vita lib. 1. cap. 82. Tamerlanes dicitur, ex materno utero sanguine atro plenas manus extulisse. Cum Joannes Fridericus Elector Saxonix natus esset, in dorso Infantis crux auricolor visa est, de qua Senex quidam Sacerdos interrogatus respondit: *Hic puer crucem gestabit, toti Orbi conspicuam.*

*Polyhist.
sub Carolo
IV.*

Indoles etiam, pueri virum bellatorem prodit. Refert Salianus ex Cedreno ad annum Mundi 3047, Sapientissimum Salomonem, Reginam Sabæ accessisse, & inter alia tentandæ ejus Sapientiæ ænigmata, sex pueros & puellas formâ præstantes consimili prorsus ha-

bîtu ex ornatu instructos coram eo constituisse, petiis-
seqvè, num ex Physiognomia & vultûs lineamentis di-
gnosceret inter Sexum valeret? Rex omnes intuitus,
quempiam ex Aulicis vas aquæ adferre jubet, ac singu-
lis, faciem ut frigidâ abluant, imperat: quo astu discrimen Sexûs illicò deprehendit, nam Mares intrepidè ac
strenuè vultum confricabant, puellæ timidè, ac tenuiter se aspergebant: adeò teneris in annis, se ostentat animus masculus, qualem etiam Achilles habuit.

DECORA MILITIS.

DECUS PHILOSOPHICVM.

IN Physico exercitu, tanta est Heroicorum animorum unio, ut omnes ejusdem credas temperamenti, nunquamq; ullum ab alio impeti experiaris. Hinc est articulus militiæ Physicæ: *Gradus intensiōis sunt homogenei, nec datur actio similis in simile.*

DECUS POLITICVM.

PRIMUM DECUS MILITIS est PIETAS MILITARIS. Primum planè victoriæ insigne est, si cum Jove manus moveas, & sub bellicis signis, foederatorum Cœlitum auxiliares ducas suppetias. Heraclium Cæsarem ad bellum contra Persas accinctum, ac atratos calceos, in signum poenitentiae cum tota militia indutum, orantemq; Georgius, Pisidentis Episcopus, sic est allocutus: *Nigrum Imperator nunc indute calceum, rubefacies tinctum cruore Persico.* Quod & factum est. Ita Pietatem Principum sequitur comes victoria. Hinc Cambyfes Persarum Rex, Filio ad Astyagem proficiscenti, hoc unum, inquit, præcipuè commendo, idq; tanquam
preti-

pretiosum thesaurum à Patre donatum, in tua memoria perpetuo recondi cupio: Dei esto amicus, in eundem pius, nihilq; aggrediaris, nisi Divino Numine implorato: imbecillis enim est & hebes mortalium natura, nihil autem Dei Sapientiam latet, omnia ex sententia ipsius cedunt, quibus illa preesto est. Nec facile hostis aggreditur, Divorum Cœlitum auctum suppetiis militem. Cum Fridericus Dux Saxonie, Comiti Bichlingio, Antistiti Magdeburgensi, bellum esset illaturus, exploratorem misit, qui ejus consilia, & apparatus bellicum indagaret. Is renuntiavit, nihil bello opportunum parari, neq; ibi conscribi militem; Antistitem insuper dixisse, se causam commissurum Deo, qui pro se arma sumpturus sit. Quod cum Fridericus cognovisset: alius, inquit, insaniat, ut bellum inferat ei, qui confidit se Deum defensorem habiturum.

DECUS SECUNDUM Militis, est accinctum in bello, discinctum ferro in Patria latus. Hinc Theodoricus Rex, Militiam Romanam monet apud Cassiodorum Lib. 3. Epist. 24. *Illud præterea vos volumus admonendos, ut non in vos, sed in hostem sævire cupiatis, deponite ferrum, qui non habetis inimicum. Inermem planè, intra viscera Patriæ, Militem voluit Pompejus Magnus, qui teste Forrerio, quos præmisisset ad bellum, illorum gladiis annuli signum impressit, ne quem in via offenderent. Infame enim bellum est cum Domesticis, infamius adhuc cum inermi imbelliq; plebe, infamissimum & damnosissimum cum re agraria. Anno 1462. Fridericus I. Palatinus Comes cæpit in bello Carolum Marchionem Brandenburgensem, cum pluribus Ducibus Comitibusqvè, iisq; ad arcem deductis, ac solenni exceptis convivio, prohibuit apponi panem, eumqvè postulantibus renuntiari jussit; bella geri debere, ut petatur armatus hostis, non inermis agrestium turba, quorum segetes illi vastaverant, frumentumq; in horrea comportatum, succensis pagis exusserant. Quid, quod*

Eberus.

quòd teste Nicephoro, non probabile rem benè gesturos eos, qui lachrymas, & execrationes pro viatico fecum afferant? Cùm Jagello Rex Stationem à Spiritu-
alium subditis exegisset, & pignora ab iis qui non paruerant, accepisset, ac eam ob rem ab Hedwige Regina reprehensus, restitui iussisset, Regina suspirans subiecit:
Pignora quidem reddem, ceterùm lachrymas, quis eis reddet?

DECUS TERTIUM est FORTITUDO MILITARIS. Carolus V. in comparando exercitu, se caput sumere ab Italis, brachia & manus ab Hispanis, pectus à Germanis, ventrem & pedes ex reliqua gentium colluvie desiderabat. Ita dotatum militem voluit Invictissimus ille Imperator. Inter reliquas verò, dos est præcipua Militis Fortitudo. *Fortibus indigeo, quos ipsa pericula durant*, vox bellici Imperatoris, hoc est, quibus mori ludus, aut somnus est. Talis erat ex Cæsarianis aliquis in hostem inVectus, antequam moriturus procumberet, centum quadraginta quatuor ictibus, Scutum perforatum ostendit. Russus Geminius accepto vulnere exspirans Quæstori demandabat, REFER AD SENATUM, VIROS FORTES SIC MORI. Talis etiam erat Miles Cassius Scæva, qui oculum telo confixum taboq; stillantem ipse sibi eruit, & in terram projectum, pede conculcavit. Talis Petronius captus, qui, dum ab hoste illi vita donaretur, respondit: *Serva tuum crudele munus, Cæsaris Milites salutem dare, non petere consueverunt.*

DECUS HISTORICVM.

Summum Decus Militis est, Exemplum Ducis. Alexander Parmensis in oblidione Traiecti, cùm nec Fossores adessent, nec Rustici Traiectensis territorii ad opus compelli possent, animatis militum aliis, stipendii amplioris spe, aliis exemplo, primus sumpto ipse li-
gone,

gone, moliri humum & comportare humeris fascēs :
 simul sequi Principem Aulici, tūm & ipsi primores, &
 omnis certatim exercitus, intraq; biduum castella 4.
 plurium centuriarum capacia, fossâ ac vâllo præmuni-
 ta assurrexerunt : *Quis enim non posset, aut nollet, cum Ale-*
xandro fossorem agere ? ait Strada Dec. 2. lib. 2.

Scilicet, in vulgus manant exempla regentū.

Vtq; Ducum lituos, sic mores castra sequuntur.

*Claud. de
 laud. Stil.
 lib. 1.*

Sic in bellis præcedebat Annibal, sic Julius Cæsar, sic
 Malsinissa Numidarum Rex, sic Hadrianus, sic Severg.
 Svetonius de Julio ait cap. 37. *in agmine pedibus ante-*
ibat capite detecto, seu Sol seu imber esset. Hadrianus Im-
 perator, ait Xiphilinus, nullo calore, nullo frigore,
 capite operto fuit, nec enim aut propter nives Celticas,
 aut calores Ægyptios se operuit. Nec minùs Ducum,
 quàm Sociorum Heroum exempla movent. Ita The-
 mistocli somnum excusserunt Miltiadis trophæa : Julio
 Alexandri felices impetus : Alexandro Achilles ab Ho-
 mero cantatus.

Lusitani cum Castellanis pugnaturi, Ducis sui Jo-
 annis à Castello capti vinctiq; compedibus, effigiem
 vexillis prætulerunt. Ingens animorum mutatio facta :
 vivi spiritus micuerunt in flammam, ambabus ulnis
 bellum arreptum. Itali Boldrini Panicaciæ, siccatum
 cadaver, impletumq; aromatibus, in feretro circumtu-
 lerunt. Non secus ac vivo spirantiq; tendebatur præ-
 torium, & circumpositis vexillis tessera petebatur, ini-
 micis metuenda.

FATA MILITUM.

FATVM PHILOSOPHICVM.

M Illite forti vitâ spoliato, non omnia in prædam
 cedunt, Marti hostili, vel morti ultimo hosti, ma-
 nent

nent quædam decora communia tam superstiti, quam extincto, hinc & tessera militis Phyci: *In corruptione substantiali, non datur resolutio usq; ad materiam primam.*

FATVM POLITICVM.

Sua sunt etiam fortissimis Heroibus fata, nec ullus tantum Marte valuit, ut mortem superaret, nullus in tantum victoriarum processit, ut ultimam rerum lineam excederet. Carolus V. pro Symbolo Herculeas gestabat metas, cum Lemmate: *Plus ultra*; verum quispiam inscripsit:

Non plus Alcides, plus ultra Carolus: at mors

Plus ultra nemo progredietur, ait.

Philippi II. Hispaniarum Regis Symbolum erat Eques cataphractus cum Lemmate: *Quis valet?* id est, de equo Sessorem deicere; verum quispiam subscripsit:

Qui valet armigeros, Rex deiecit armiger omnes,

Mors tamen heu Reges deiecit armigeros!

Si ubi verò, in bello ejusmodi ruinarum feracissimus camp9, & solenne ut Martis, sic mortis theatrum. Nemini bella parcant, validiores celerius obteruntur, quot animosos Duces ac milites Troja consumpsit, robur Achivum muris allisum procubuit. Pulcherrimi Dardanidum cecidère cum Choroëbo, Hector curru tractus, Priamus post Aram immolatus, reliquos ensis hausit & flamma; verum fortes viri contemnunt vitam & mortem, deliberatâ morte ferociiores. Epaminondas olim in pugna ad Manticham saucius, & fato proximus, cum fusos hostes, victores suos comperisset, *non finis*, inquit, *vite meæ*, *sed melius & auctius initium advenit, nunc enim vester Epaminondas nascitur, quia sic moritur:*

Qui

*Qui cadit magnus, jacet ille magnus,
Non premit fortes, celebrat ruina,
Vulnus armatum decorat cadaver.*

59

FATVM HISTORICVM.

PLato res humanas ludibrio esse DEO dixit, fursùm-
què ac deorsùm temerè ferri omnia, incertoq; cur-
su vagari: sic in bellis contingit, ut alterno redeant
choro, risus & gemitus, læta epinicia, & tristia epicæ-
dia, & nunc triumphales palmæ lugubri cupressò,
nunc lugubres cupressi laurigeris truncis implantentur.
Quid profuit Fabio Maximo liberâsse Romam è fauci-
bus Punicis? quid Scipioni Africano? audio queri-
tantis vocem, *Ingrata Patria, nec quidem ossa mea habes.*
Quid Annibali profuit, tot annos galeis tectos impen-
disse Carthagini? transi ad Græcos, Themistocles,
Pausanias, aliq; sexcenti, cineri suo eadem suspiria in-
scripsêre. Plures invenies, quos nec sepulchro fortu-
na belli est dignata. Phocion vigesies Imperator di-
ctus, tumuli honore caruit. Pyrrhus urnâ, Magnus
rogo, Magni nominis avidi; sæpè magnâ oblivione
obruuntur, in murium cavernis, non unius etiam for-
tissimi militis fama jacet. Sicinio Dentato, plusculum
indulsi Superba Campi Domina, is Achilles Romanus
nominatus, centum & viginti præliis, vulnera adver-
sa tulit quadraginta quinque, ne Marti quidem erube-
scenda, donatus aureis coronis octo, unâ obsidionali,
tribus Muralibus, Civicis quatuordecim, novem Tri-
umphis, immensâ vi torqvium, hastarum, phalerarum:
sed rari hi nantes, plures majores Sicinio, non tamen
feliciores vidit Orbis. Apud Romanos Manlius Tor-
quatus, qui contra rebelles Latinos exercitum ducens,
unicum habebat filium, quòd extra ordinem à Magistro
Equitum Latinorum provocatus pugnâssêt, capite pu-

nivit, etiam victorem: Fortiter, inquit, fili mi dimicasti, eaq; de causa te coronâ donabo; sed quia neque imperium Consulare es veritus, eâ moderatione adversus te utar, ut & virtutis tuæ fructum percipias, & contumaciæ poenas des. Atque hæc, dicens, inquit Zonaras, & coronam capiti imposuit, & caput amputavit. Ita sæpè fortuna belli lætat ut mactet, attollitque sub sidera, ut infra terras deijciat. Interim quisquis pro salute Patriæ moritur, non potest fato nobiliore mori, & quem pro Patria decorat numerosa cicatrix, & inaspectabile tabum, sua post fata superstitem, triumphali tæniâ, ipsa coronabit æternitas.

REPRÆSENTATIO PANEGYRICA.

MILITIS POLONI.

*Inter Omina, Decora, & Fata
fortunatissima.*

IN ILLVSTRISSIMO PALATINO
INOVLADISLAVIENSI.

INter Bellonæ lituos, Martiosq; strepitus, hætenus GALECCIANA versata Philosophia, jam tandem ad Tuas laureas & trophæa subsistat Illustrissime Domine. Monstravêre illi nobile Martis iter, laureata bellatoris Agni vestigia, Vkrainensibus campis, Budziacensibusq; impressa arenis, quæ etiamnum Getico Marti, ut veteris illius manns Myronis, horrore sunt & pavori. Nascantur

pro-

prodigio, in Insula Chio, fortes ab imbellibus oviculis Leones, in Illustrissima GALECCIANA Domo, nihil magis vulgare, quàm ex avito Iunossa Leones nasci illos, quibus non alia cunabula, quàm barbaricarum ferarum exuvie, non alia pascua, quàm in arena Martis herbe triumphales, è tumulis Barbarorum pullulantes. Posuisti prima auspicia belli, Majorum victorias, lustravitq; Tuos, Aquilis victricibus ortus Miles: credo ego non prius Te arma tractasse virum, quàm puerum per scuta raptasse, non ignorasti nempe Magne Palatine, non ferre ullum ictum illesam felicitatem, assiduâq; cum incommodis rixâ, callum per injurias induci; ut fortunæ ità fortitudinis partus paralellos esse, à cunabulis ad sagum, ab arduis ascendendum ad ardua. Flavius Domitianus, cui totum robur in cognomen abierat, ille inquam Domitianus, domi muscarum hostis, foris musca hostium, ille clarissimo suo Patri similis, ut soli lutum, bis navali prelio interfuit, sed in arena, bis triumphavit, sed nec semel scivit vincere; Tu in Vinnensibus, Strigoniensibus, Podoliensibus, Vkrainensibus campis, ità fortiter maximis quibusq; Te objiciebas periculis, ut vitari timeriq; ab illis crederis. Sed ut modestie Tue, aliquid indulgeam Illustrissime Domine, millena quidem Tuâ trophæa, totidem encomia exigunt, verum abripit calamum & animum, Budziacensis illa belli magnitudo ca-

620 *limitatibus nostris approbata: Vidimus inter d-
serta Budziacensia, desertas nostras fortunas, am-
missisq; omnibus belli praesidijs, quod ultimum super-
erat, ipsi emortuae fortune nostrae Vespillones, ac
Sandapilarij, tormenta bellica, in terra Barbarorum
defodimus, ac tumulavimus, dixeramusq; novis-
sima verba, nisi tu aliter loqui docuisses. illa mor-
tuaria, dum velut mortua sepelirentur, verè tunc
nomen suum intra tumulos invenerant, nisi Te su-
scitatore habuissent. Ivisti inter prostratas fortu-
nas, grandesq; mortuorum ac morientium acervos,
vivido erectoq; animo Agamemnon Sarmatiae, cui
inter tot fortunarum ruinas immoto, non dubito
quin inter classica belli, Polonus Mars accinuerit.*

Dares.

*Martius ornat honos Agamemnona, fusa vigore
Celsaq; membra foveat, vultu pracone potestas,
Enitet, & Martem species armata profatur.*

*Nempè ubi pluribus fatalis occasus, Syculeq; vespere
fugiebantur, tu Orientem Patriae felicitatis se-
quebaris. Venisti ad fatale nostrarum fortunarum
sepulchrum, tumultataq; cum machinis bellicis spes
suscitasti, prodigiosamq; hanc aeneorum corporum
resurrectionem ostendisti, postquam tumultata jam
mortuaria, in mille mortes Getarum animasses.
Conclamaverant jam de nostra felicitate Budzia-
censes Praedones, nisi Te inaudito exemplo, ad
portas suas Annibalem conclamantes, Palinodiam
canere compulsi, Polonorum spem ab ipsa despera-
tione, infelicis Matris felicioris filiam nasci, pro-
clamas-*

clamâssent. Redijsti reduxistiq; in Patriam, belli 63
Machinas, totidemq; trophæa, Te ipso nihilominus
Trophæum majus reducere non poteras; quanta
tunc universæ Poloniæ gaudia, quanti inter gau-
dia, GALECCIANÆ gloriæ applausus, quanta
in applausibus vota: alij Tibi ponebant obeliscos
ut Augusto, alij columnas triumphales ut Trajano,
alij inscriptas auro tabulas ut Alexandro, arcus alij
ut Constantino: Tu interim benè meruisse conten-
tus, nec plausu clarescere vulgi, nec superbâ mole,
Tuam magnitudinem attolli, satis de Te Magnus
desiderabas, nempe sufficiebas Tibi Tu ipse, scili-
cet Cato Catoni. Vive Herodum maxime, etatem
quam mereris, serventq; superi incolumitatem quam
dederunt, adversa nè verearis fata, quia hæc forti-
bus viris, qualis Tu es, ad nutum & manum
sunt.

Quando alios clamor feret alti carmine plausus;
Te fragor & gemitus Thracû, sub fidera tollent,
Te Tabo hostili, permixta Borysthenis unda,
Per scopulos, rippasq; feret, fluctusq; sonantes,
Quo sol ipse suos radios efferre laborat.

Ad M. D. G. B. V. M.

S. L. O. C.

Honorem.

BIBLIOTHECA UNIVERSITATIS



MACDONALD

M. D. C. B. V. M.

S. L. O. C.

Honorable

Biblioteka Jagiellońska



sidr0020258

[illegible]